

經

南
大
般
涅
槃
經

二十一之
二十五

樹

C40
4514
42



C 40-4574

了翁上座請大藏及百
家書置於武州紫雲山
我徵笑瑤院廡府中永
為學者不敢許出院內
當山二世鐵千機謹誌



B 64853

南本大般涅槃經卷第二十一

北涼天竺三藏曇無讖譯梵

宋沙門慧嚴慧觀同謝靈運再治

高貴德王菩薩品第二十二之三

復次善男子凡夫若遇身心苦惱起種種惡若得身
病若得心病令身口意作種種惡以作惡故輪迴三
趣具受諸苦何以故凡夫之人無念慧故是故生於
種種諸漏是名念漏菩薩摩訶薩常自思惟我從往
昔無數劫來為是身心造種種惡以是因緣流轉生
死在三惡道具受眾苦遂令我遠三乘正路菩薩以

是惡因緣故於已身心生大怖畏捨離衆惡趣向善道善男子譬如王以四毒蛇盛之一篋令人養食瞻視臥起摩洗其身若令一蛇生瞋恚者我當準法戮之都市爾時其人聞王切令心生惶怖捨篋逃走王時復遣五旃陀羅拔刀隨之其人迴顧見後五人遂疾捨去是時五人以惡方便藏所持刀密遣一人詐爲親善而語之言汝可來還其人不信投一聚落欲自隱匿既入聚中闚視諸舍都不見人執諸甕器悉空無物既不見人求物不得即便坐地聞空中聲咄哉男子此聚空曠無有居民今夜當有六大賊來

汝設遇者命將不全汝當云何而得免之爾時其人恐怖漸增復捨而去路值一河河水漂急無有船筏以怖畏故即取種種草木爲筏復更思惟我設住此當爲毒蛇五旃陀羅一詐親善及六大賊之所危害若渡此河筏不可依當沒水死寧沒水死終不爲彼蛇賊損害即推草筏置之水中身倚其上運手動足截流而去即達彼岸安隱無患心意泰然恐怖消除菩薩摩訶薩得聞受持大涅槃經觀身如篋地水火風如四毒蛇見毒觸毒氣毒齧毒一切衆生遇是四毒故喪其命衆生四大亦復如是或見爲惡或觸爲

惡或氣爲惡或齧爲惡以是因緣遠離衆善復次善男子菩薩摩訶薩觀四毒蛇有四種性所謂剎利婆羅門毗舍首陀是四大蛇亦復如是有四種性堅性濕性熱性動性是故菩薩觀是四大與四毒蛇同其種性復次善男子菩薩摩訶薩觀是四大如四毒蛇云何爲觀是四毒蛇常伺人便何時當視何時當觸何時當噓何時當齧四大毒蛇亦復如是常伺衆生求其短缺若爲四蛇之所殺者終不至於三惡道中若爲四大之所殺害必至三惡定無有疑是四毒蛇雖復瞻養亦欲殺人四大亦爾雖常供給亦常牽人

造作衆惡是四毒蛇若一瞋者則能殺人四大之性亦復如是若一大發亦能害人是四毒蛇雖同一處四心各異四大毒蛇亦復如是雖同一處性各別異是四毒蛇雖復恭敬難可親近四大毒蛇亦復如是雖復恭敬亦難親近是四毒蛇若害人時或有沙門婆羅門等若以呪藥則可療治四大殺人雖有沙門婆羅門等神呪良藥皆不能治如自喜人聞四毒蛇氣臭可惡則便遠離諸佛菩薩亦復如是聞四大臭即便遠離爾時菩薩復更思惟四大毒蛇生大怖畏背之馳趣修八聖道五旃陀羅者卽是五陰云何菩

薩觀於五陰如旃陀羅旃陀羅者常能令人恩愛別離怨憎集會五陰亦爾令人貪近不善之法遠離一切淳善之法復次善男子如旃陀羅種種器仗以自莊嚴若刀若盾若弓若箭若鎧若稍能害於人五陰亦爾以諸煩惱牢自莊嚴害諸癡人令墮諸有善男子如旃陀羅有過之人得便害之五陰亦爾有諸結過常能害人是故菩薩深觀五陰如旃陀羅復次菩薩觀察五陰如旃陀羅旃陀羅人無慈憫心怨親俱害五陰亦爾無慈憫心善惡俱害如旃陀羅惱一切人五陰亦爾以諸煩惱常惱一切生死衆生是故菩

薩觀於五陰如旃陀羅復次菩薩觀察五陰如旃陀羅旃陀羅人常懷害心五陰亦爾常懷諸結惱害之心如人無足刀仗侍從當知必爲旃陀羅人之所殺害衆生亦爾無足無刀無有侍從則爲五陰之所賊害足名爲戒刀名爲慧侍從名爲諸善知識無此三事故爲五陰之所賊害是故菩薩觀於五陰如旃陀羅復次善男子菩薩摩訶薩觀察五陰過旃陀羅何以故衆生若爲五旃陀羅之所殺者不墮地獄爲陰殺者則墮地獄是故菩薩觀察五陰過旃陀羅作是觀已而作願言我寧終身近旃陀羅不能暫時親近

五陰旃陀羅者惟能害於欲界癡人是五陰賊徧害三界凡夫衆生旃陀羅人惟能殺戮有罪之人是五陰賊不問衆生有罪無罪悉能害之旃陀羅人不害衰老婦女稚小是五陰賊不問衆生老小婦女一切悉害是故菩薩深觀五陰過旃陀羅是故發願寧當終身近旃陀羅不能暫時親近五陰復次善男子旃陀羅者惟害他人終不自害五陰之賊自害害他旃陀羅人可以善言錢財寶貨求而得脫五陰不爾不可強以善言誘喻錢財寶貨求而得脫旃陀羅人於四時中不必常殺五陰不爾常於念念害諸衆生旃

陀羅人惟在一處可有逃避五陰不爾徧一切處無可逃避旃陀羅人雖復害人害已不隨五陰不爾殺衆生已隨逐不離是故菩薩寧以終身近旃陀羅不能暫時親近五陰有智之人以善方便得脫五陰善方便者卽入聖道六波羅蜜四無量心以是方便而得解脫身心不爲五陰所害何以故身如金剛心如虛空是故身心難可沮壞以是義故菩薩觀陰成就種種諸不善法生大怖畏修入聖道亦如彼人畏四毒蛇五旃陀羅涉路而去無所顧留詐親善者名爲貪愛菩薩摩訶薩深觀愛結如怨詐親若知實者則

無能爲若不知者必爲所害貪愛亦爾若知其性則不能令衆生輪轉生死苦中若不知者輪迴六趣具受衆苦何以故愛之爲病難捨離故如怨詐親難可遠離怨詐親者常伺人便令愛別離怨憎合會愛亦如是令人遠離一切善法近於一切不善之法以是義故菩薩摩訶薩深觀貪愛如怨詐親見不見故聞不聞故如凡夫人見生死過雖有智慧以癡覆故後還不見聲聞緣覺亦復如是雖見不見雖聞不聞何以故以愛心故所以者何見生死過不能疾至阿耨多羅三藐三菩提以是義故菩薩摩訶薩觀此愛結

如怨詐親云何名爲怨詐親相如怨不實詐現實相不可親近詐現近相實是不善詐現善相實是不愛詐爲愛相何以故常伺人便欲爲害故愛亦如是常爲衆生非實詐實非近詐近非善詐善非愛詐愛常誑一切輪迴生死以是義故菩薩觀愛如怨詐親怨詐親者但見身口不覩其心是故能誑愛亦如是惟爲虛誑實不可得是故能惑一切衆生怨詐親者有始有終易可遠離愛不如是無始無終難可遠離怨詐親者遠則難知近則易覺愛不如是近尚難識况復遠知以是義故菩薩觀愛過於詐親一切衆生以

愛結故遠大涅槃近於生死遠常樂我淨近無常苦
無我不淨是故我於處處經中說爲三垢於現在事
以無明故不見過患不能捨離愛怨詐親終不能害
有智之人是故菩薩深觀此愛生大怖畏修入聖道
猶如彼人畏四毒蛇五旃陀羅及一詐親涉路不迴
空聚落者卽內六入菩薩摩訶薩觀此六入空無所
有猶如空聚如彼怖人旣入聚已乃至不見有一居
人徧捉甌噐不得一物菩薩亦爾諦觀六入空無所
有不見眾生一物之實是故菩薩觀內六入空無所
有如彼空聚善男子彼空聚落羣賊遠望終不生於

空虛之想凡夫之人亦復如是於六入聚不生空想
以其不能生空想故輪迴生死受無量苦善男子羣
賊旣至乃生空想菩薩亦爾觀此六入常生空想生
空想故則不輪迴生死受苦菩薩摩訶薩於此六入
常無顛倒無顛倒故是故不復輪迴生死復次善男
子如有羣賊入此空聚則得安樂煩惱諸賊亦復如
是入此六入則得安樂如賊住空聚心無所畏煩惱
羣賊亦復如是住是六入亦無所畏如彼空聚乃是
師子虎狼種種惡獸之所住處是內六入亦復如是
一切衆惡煩惱惡獸之所住處是故菩薩深觀六入

空無所有純是一切不善住處復次善男子菩薩觀
內六入空無所有如彼空聚何以故虛誑不實故空
無所有作有想故實無有樂作樂想故實無有人作
人想故內六入者亦復如是空無所有而作有想實
無有樂而作樂想實無有人而作人想惟有智人乃
能知之得其真實復次善男子如空聚落或時有人
或時無人六入不爾一向無人何以故性常空故智
者所知非是眼見是故菩薩觀內六入多諸怨害修
入聖道不休不息猶如彼人畏四毒蛇五旃陀羅一
詐親善及六大賊怖著正路六大賊者卽外六塵苦

薩摩訶薩觀此六塵如六大賊何以故能劫一切諸
善法故如六大賊能劫一切人民財寶是六塵賊亦
復如是能劫一切衆生善財如六大賊若入人舍則
能劫奪現家所有不擇好惡令巨富者忽然貧窮是
六塵賊亦復如是若入人根則能劫奪一切善法善
法旣盡貧窮孤露作一闍提是故菩薩諦觀六塵如
六大賊復次善男子如六大賊欲劫人時要因內人
若無內人則便中還是六塵賊亦復如是欲劫善法
要因內有衆生知見常樂我淨不空等相若內無有
如是等相六塵惡賊則不能劫一切善法有智之人

內無是相凡夫則有是故六塵常來侵奪善法之財不善護故爲其所劫護者名慧有智之人能善防護故不被劫是故菩薩觀是六塵如六大賊等無差別復次善男子如六大賊能爲人民身心苦惱是六塵賊亦復如是常爲衆生身心苦惱六大賊者惟能劫人現在財物是六塵賊常劫衆生三世善財六大賊者夜則歡樂六塵惡賊亦復如是處無明闇則得歡樂是六大賊惟有諸王乃能遮止六塵惡賊亦復如是惟佛菩薩乃能遮止是六大賊凡欲劫奪不擇端正種性聰哲多聞博學豪貴貧賤六塵惡賊亦復如

是欲劫善法不擇端正乃至貧賤是六大賊雖有諸王截其手足猶故不能令其心息六塵惡賊亦復如是雖須陀洹斯陀舍阿那含截其手足亦不能令不劫善法如勇健人乃能摧伏是六大賊諸佛菩薩亦復如是乃能摧伏六塵惡賊譬如有人多諸種族宗黨熾盛則不爲彼六賊所劫衆生亦爾有善知識不爲六塵惡賊所劫是六大賊若見人物則能偷劫六塵不爾若見若知若聞若嗅若觸若覺皆悉能劫六大賊者惟能劫奪欲界人財不能劫奪色無色界六塵惡賊則不如是能劫三界一切善寶是故菩薩諦

觀六塵過彼六賊作是觀已修入聖道直往不迴如
彼怖人畏四毒蛇五旃陀羅一詐親善及六大賊捨
空聚落涉路而去路值一河者卽是煩惱云何菩薩
觀此煩惱猶如大河如彼駛河能漂香象煩惱駛河
亦復如是能漂緣覺是故菩薩深觀煩惱猶如駛河
深難得底故名爲河邊不可得故名爲大其中多有
種種惡魚煩惱大河亦復如是惟佛菩薩能得底故
故名極深惟佛菩薩得其邊故故名廣大常害一切
癡衆生故故名惡魚是故菩薩觀此煩惱猶如大河
如大河水能長一切草木叢林煩惱大河亦復如是

能長衆生二十五有是故菩薩觀此煩惱猶如大河
譬如有人墮大河水無有慚愧衆生亦爾墮煩惱河
無有慚愧如墮河者未得其底卽便命終墮煩惱河
亦復如是未盡其底周迴輪轉二十五有所言底者
名爲空相若有不修如是空相當知是人不得出離
二十五有一切衆生不能善修空無相故常爲煩惱
駛河所漂如彼大河惟能壞身不能漂沒一切善法
煩惱大河則不如是能壞一切身心善法彼大暴河
惟能漂沒欲界中人煩惱大河乃能漂沒三界人天
世間大河運動手足則到彼岸煩惱大河惟有菩薩

因六波羅蜜乃能得度如大河水難可得度煩惱大河亦復如是難可得度云何名爲難可得度乃至十住諸大菩薩猶故未能畢竟得度惟有諸佛乃畢竟度是故名爲難可得度譬如有人爲河所漂不能修習毫釐善法衆生亦爾爲煩惱河所漂沒者亦復不能修習善法如人墮河爲水所漂餘有力者則能拔濟墮煩惱河爲一闍提聲聞緣覺乃至諸佛不能救濟世間大河劫盡之時七日並照能令枯涸煩惱大河則不如是聲聞緣覺雖修七覺猶不能乾是故菩薩觀諸煩惱猶如暴河譬如彼人畏四毒蛇五旃陀

羅一詐親善及六大賊捨空聚落隨路而去既至河上取草爲筏者菩薩亦爾畏四大蛇五陰旃陀羅愛詐親善六入空聚六塵惡賊至煩惱河修戒定慧解脫解脫知見六波羅蜜三十七品以爲船筏依乘此筏度煩惱河到於彼岸常樂涅槃菩薩修行大涅槃者作是思惟我若不能忍受如是身苦心苦則不能令一切衆生度煩惱河以是思惟雖有如是身心苦惱默然忍受以忍受故則不生漏如是菩薩尚無諸漏況佛如來而當有漏是故諸佛不名有漏云何如來非無漏耶如來常行有漏中故有漏卽是二十五

有是故聲聞凡夫之人言佛有漏諸佛如來真實無漏善男子以是因緣諸佛如來無有定相善男子是故犯四重禁謗方等經及一闍提悉皆不定爾時光明徧照高貴德王菩薩摩訶薩言如是如是誠如聖言一切諸法悉皆不定以不定故當知如來亦不畢竟入於涅槃如佛上說菩薩摩訶薩修大涅槃聞不聞中有涅槃有大涅槃云何涅槃云何大涅槃爾時佛讚光明徧照高貴德王菩薩摩訶薩言善哉善哉善男子若有菩薩得念總持乃能如汝之所咨問善男子如世人言有海大海有河大河有山大山有地

大地有城大城有衆生大衆生有王大王有人大人有天天中天道大道涅槃亦爾有涅槃有大涅槃云何涅槃善男子如人飢餓得少飯食名爲安樂如是安樂亦名涅槃如病得差則得安樂如是安樂亦名涅槃如人怖畏得歸依處則得安樂如是安樂亦名涅槃如貧窮人獲七寶物則得安樂如是安樂亦名涅槃如人觀骨不起貪欲則得安樂如是安樂亦名涅槃如是涅槃不得名爲大涅槃也何以故以飢渴故病故怖故貧故生貪著故是名涅槃非大涅槃善男子若凡夫人及以聲聞或因世俗或因聖道斷

欲界結則得安樂如是安樂亦名涅槃不得名爲大涅槃也能斷初禪乃至能斷非想非非想處結則得安樂如是安樂亦名涅槃不得名爲大涅槃也何以故還生煩惱有習氣故云何名爲煩惱習氣聲聞緣覺有煩惱氣所謂我身我衣我去我來我說我聽諸佛如來入於涅槃涅槃之性無我無樂惟有常淨是則名爲煩惱習氣佛法衆僧有差別相如來畢竟入於涅槃聲聞緣覺諸佛如來所得涅槃等無差別以是義故二乘所得非大涅槃何以故無常樂我淨故常樂我淨乃得名爲大涅槃也善男子譬如有一處能

受衆流名爲大海隨有聲聞緣覺菩薩諸佛如來所入之處名大涅槃四禪三三昧八背捨八勝處十一切處隨能攝取如是無量諸善法者名大涅槃善男子譬如有一香象不能得底則名爲大聲聞緣覺至十住菩薩不見佛性名爲涅槃非大涅槃若能了了見於佛性則得名爲大涅槃也是大涅槃惟大象王能盡其底大象王者謂諸佛也善男子若摩訶那伽及鉢建陀大力士等經歷多時所不能上乃名大山聲聞緣覺及諸菩薩摩訶那伽大力士等所不能見如是乃名大涅槃也復次善男子隨有小王之

所住處名爲小城轉輪聖王所住之處乃名大城聲聞緣覺八萬六萬四萬二萬一萬住處名爲涅槃無上法王聖王住處乃得名爲大般涅槃以是故名大般涅槃善男子譬如有人見四種兵不生怖畏當知是人名大衆生若有衆生於三惡道煩惱惡業不生怖畏而能於中廣度衆生當知是人得大涅槃若有人能供養父母恭敬沙門及婆羅門修治善法所言誠實無有欺誑能忍諸惡惠施貧乏名大丈夫菩薩亦爾有大慈悲憐憫一切於諸衆生猶如父母能度衆生於生死河普示衆生一實之道是則名爲大般

涅槃善男子大名不可思議若不可思議一切衆生所不能信是則名爲大般涅槃惟佛菩薩之所見故名大涅槃以何因緣復名爲大以無量因緣然後乃得故名爲大善男子如世間人以多因緣之所得者則名爲大涅槃亦爾以名因緣之所得故名爲大云何復名爲大涅槃有大我故名大涅槃涅槃無我大自在故名爲大我云何名爲大自在耶有八自在則名爲我何等爲八一者能示一身以爲多身身數大小猶如微塵克滿十方無量世界如來之身實非微塵以自在故現微塵身如是自在則爲大我二者

示一塵身滿於三千大千世界如來之身實不滿於
大千世界何以故以無闕故直以自在故滿三千大
千世界如是自在名爲大我三者能以滿此三千大
千世界之身輕舉飛空過於二十恒河沙等諸佛世
界而無障闕如來之身實無輕重以自在故能爲輕
重如是自在名爲大我四者以自在故而得自在云
何自在如來一心安住不動所可示化無量形類各
令有心如來有時或造一事而令衆生各各成辦如
來之身常住一土而令他土一切悉見如是自在名
爲大我五者根自在故云何名爲根自在耶如來一

根亦能見色聞聲嗅香別味覺觸知法如來六根亦
不見色聞聲嗅香別味覺觸知法以自在故令根自
在如是自在名爲大我六者以自在故得一切法如
來之心亦無得想何以故無所得故若是有者可名
爲得實無所有云何名得若使如來計有得想是則
諸佛不得涅槃以無得故名得涅槃以自在故得一
切法得諸法故名爲大我七者說自在故如來演說
一偈之義經無量劫義亦不盡所謂若戒若定若施
若慧如來爾時都不生念我說彼聽亦復不生一偈
之想世間之人若四以爲偈隨世俗故說名爲偈一

切法性亦無有說以自在故如來演說以演說故名
爲大我入者如來徧滿一切諸處猶如虛空虛空之
性不可得見如來亦爾實不可見以自在故令一切
見如是自在名爲大我如是大我名大涅槃以是義
故名大涅槃復次善男子譬如寶藏多諸珍異種種
具足故名大藏諸佛如來甚深奧藏亦復如是多諸
奇異具足無缺名大涅槃復次善男子無邊之物乃
名爲大涅槃無邊是故名大復次善男子有大樂故
名大涅槃涅槃無樂以四樂故名大涅槃何等爲四
一者斷諸樂故不斷樂者則名爲苦若有苦者不名

大樂以斷樂故則無有苦無苦無樂乃名大樂涅槃
之性無苦無樂是故涅槃名爲大樂以是義故名大
涅槃復次善男子樂有二種一者凡夫二者諸佛凡
夫之樂無常敗壞是故無樂諸佛常樂無有變異故
名大樂復次善男子有三種受一者苦受二者樂受
三者不苦不樂受不苦不樂是亦爲苦涅槃雖同不
苦不樂然名大樂以大樂故名大涅槃二者大寂靜
故名爲大樂涅槃之性是大寂靜何以故遠離一切
憤鬧法故以大寂靜名大涅槃三者一切知故名爲
大樂非一切知不名大樂諸佛如來一切知故名爲

大樂以大樂故名大涅槃四者身不壞故名爲大樂
身若可壞則不名樂如來之身金剛無壞非煩惱身
無常之身故名大樂以大樂故名大涅槃善男子世
間名字或有因緣或無因緣有因緣者如舍利弗母
名舍利因母立字故名舍利弗如摩訶羅道人坐摩
訶羅國因國立名故名摩訶羅如目捷連目捷連者
卽是姓也因姓立名故名目捷連如我生於瞿曇種
姓因姓立名稱爲瞿曇如毗舍佉道人毗舍佉者卽
是星名因星爲名名毗舍佉如有六指因六指故名
六指人如佛奴天奴因佛因天故名佛奴天奴因濕

生故故名濕生如因聲故名爲迦迦羅名究竟羅哩
咀羅如是等名是因緣名無因緣者如蓮華地水火
風虛空如曼陀婆一名二實一名殿堂二名飲漿堂
不飲漿亦復得名爲曼陀婆如薩婆車多名爲蛇蓋
實非蛇蓋是名無因強立名字如坻羅婆夷名爲食
油實不食油強爲立名名爲食油是名無因強立名
字善男子是大涅槃亦復如是無有因緣強爲立名
善男子譬如虛空不因小空名爲大也涅槃亦爾不
因小相名大涅槃善男子譬如法不可稱量不可
思議故名爲大涅槃亦爾不可稱量不可思議故得

名爲大般涅槃以純淨故名大涅槃云何純淨淨有四種何等爲四一者二十五有名爲不淨能永斷故得名爲淨淨卽涅槃如是涅槃亦得名有而是涅槃實非是有諸佛如來隨世俗故說涅槃有譬如世人非父言父非母言母實非父母而言父母涅槃亦爾隨世俗故說言諸佛有大涅槃二者業清淨故一切凡夫業不清淨故無涅槃諸佛如來業清淨故故名大淨以大淨故名大涅槃三者身清淨故身若無常則名不淨如來身常故名大淨以大淨故名大涅槃四者心清淨故心若有漏名曰不淨佛心無漏故名

大淨以大淨故名大涅槃善男子是名善男子善女人修行如是大涅槃經具足成就初分功德

大般涅槃經卷第二十一

校讎

第十四紙 五行南藏作多

音釋

篋 苦協切 箱篋也 戮 力竹切 殺也 闕 去遺切 視也 篲 俯九切 瓦器也 笱 房越切 梓也
也 齧 五結切 食尹切 盾 兵器也 鑑 可亥切 甲也 稍 所角切 示屬 龔 技詩切
切以鼻 駛 疎土切 疾也 憤 憤古對切 亂也 闕 闕 鑰 記侯切
坻 直離切

丹陽居士賀懋熙懋照懋燮懋燾懋焯仰承
 先嚴賀學禮遺願施費刻此
 南本大般涅槃經第二十一卷 計字七千二
 百六十四箇該銀三兩七錢八分
 宛陵釋如圭對長洲徐普書上元陶邦立刻
 萬曆丁巳歲春三月徑山化城寺識

南本大般涅槃經卷第二十二

北涼天竺三藏曇無讖譯梵

宋沙門慧嚴慧觀同謝靈運再治

高貴德王菩薩品第二十二之四

復次善男子云何菩薩摩訶薩修大涅槃成就具足
 第二功德善男子菩薩摩訶薩修大涅槃昔所不得
 而今得之昔所不見而今見之昔所不聞而今聞之
 昔所不至而今得至昔所不知而今知之云何名爲
 昔所不得而今得之所謂神通昔所不得而今乃得
 通有二種一者內二者外所言外者與外道共內復

有二一者二乘二者菩薩菩薩修行大涅槃經所得神通不與聲聞辟支佛共云何名爲不與聲聞辟支佛共二乘所作神通變化一心作一不得衆多菩薩不爾於一心中則能具足現五趣身所以者何以得如是大涅槃經威神力故是則名爲昔所不得而今得之又復云何昔所不得而今得之所謂身得自在心得自在何以故一切凡夫所有身心不得自在或心隨身或身隨心云何名爲心隨於身譬如醉人酒在身中爾時身動心亦隨動亦如身嬾心亦隨嬾是則名爲心隨於身又如嬰兒見其身稚小心亦隨小大

人身大心亦隨大又如有人身體羸澀心常思念欲得膏油潤漬令輒是則名爲心隨於身云何名爲身隨於心所謂去來坐臥修行施戒忍辱精進愁惱之人身則羸悴歡喜之人身則肥悅恐怖之人身體戰動專心聽法身則怡懌悲苦之人涕淚橫流是則名爲身隨於心菩薩不爾於身心中俱得自在是則名爲昔所不得而今得之復次善男子菩薩摩訶薩所現身相猶如微塵以此微身悉能徧至無量無邊恒河沙等諸佛世界無所障闕而心常定初不移動是則名爲心不隨身是亦名爲昔所不至而今能至何

故復名昔所不至而今能至一切聲聞辟支佛等所不能至菩薩能至是故名爲昔所不至而今能至一切聲聞辟支佛等雖以神通不能變身如細微塵徧至無量恒河沙等諸佛世界聲聞緣覺身若動時心亦隨動菩薩不爾心雖不動身無不至是名菩薩心不隨身復次善男子菩薩化身猶如三千大千世界以此大身入一塵身其心爾時亦不隨小聲聞緣覺雖能化身令如三千大千世界而不能以如此大身入微塵身於此事中尚自不能況能令心而不隨動是名菩薩心不隨身復次善男子菩薩摩訶薩以一

音聲能令三千大千世界衆生悉聞心終不念令是音聲徧諸世界使諸衆生昔所不聞而今得聞而是菩薩亦初不言我令衆生昔所不聞而今得聞菩薩若言因我說法令諸衆生不聞聞者當知是人終不能得阿耨多羅三藐三菩提何以故衆生不聞我爲說者如此之心是生死心一切菩薩是心已盡以是義故菩薩摩訶薩所有身心不相隨逐善男子一切凡夫身心相隨菩薩不爾爲化衆生故雖現身小心亦不小何以故諸菩薩等所有心性常廣大故雖現大身心亦不大云何大身身如三千大千世界云何

小心行嬰兒行以是義故心不隨身菩薩已於無量阿僧祇劫遠酒不飲而心亦動心無悲苦身亦流淚實無恐怖身亦戰慄以是義故當知菩薩身心自在不相隨逐菩薩摩訶薩惟現一身而諸衆生各各見異善男子云何菩薩摩訶薩修大涅槃音所不聞而今得聞菩薩摩訶薩先取聲相所謂象聲馬聲車聲人聲貝鼓簫笛歌哭等聲而修習之以修習故能聞無量三千大千世界所有地獄音聲復轉修習得異耳根異於聲聞緣覺天耳何以故二乘所得清淨耳通若依初禪淨妙四大惟聞初禪不聞二禪乃至四

禪亦復如是雖能一時聞于三千大千世界所有音聲而不能聞無量無邊恒河沙等世界音聲以是義故菩薩所得異於聲聞緣覺耳根以是異故昔所不聞而今得聞雖聞音聲而心初無聞聲之相不作有相常相樂相我相淨相主相依相作相因相定相果相以是義故諸菩薩等昔所不聞而今得聞爾時光明徧照高貴德王菩薩言如佛所說不作定相不作果相是義不然何以故如來上說若人聞是大涅槃經一句一字必定得成阿耨多羅三藐三菩提如來於今復言無定無果若得阿耨多羅三藐三菩提卽

是定相卽是果相云何而言無定無果聞惡聲故則生惡心生惡心故則至三塗若至三塗則是定果云何而言無定無果爾時如來讚言善哉善哉善男子能作是問若使諸佛說諸音聲有定果相者則非諸佛世尊之相是魔王相生死之相遠涅槃相何以故一切諸佛凡所演說無定果相善男子譬如刀中照人面像豎則見長橫則見廣若有定相云何而得豎則見長橫則見廣以是義故諸佛世尊凡所演說無定果相善男子夫涅槃者實非聲果若使涅槃是聲果者當知涅槃非是常法善男子譬如世間從因生

法有因則有果無因則無果因無常故果亦無常所以者何因亦作果果亦作因以是義故一切諸法無有定相若使涅槃從因生者因無常故果亦無常而是涅槃不從因生體非是果是故爲常善男子以是義故涅槃之體無定無果善男子夫涅槃者亦可言定亦可言果云何爲定一切諸佛所有涅槃常樂我淨是故爲定無生老壞是故爲定一闍提等犯四重禁誹謗方等作五逆罪捨除本心必定得故是故爲定善男子如汝所言若人聞我說大涅槃一字一句得阿耨多羅三藐三菩提者汝於是義猶未解了汝

今諦聽吾當爲汝更分別說善男子若有善男子善
女人聞大涅槃一字一句不作字相不作句相不作
聞相不作佛相不作說相如是義者名無相相以無
相相故得阿耨多羅三藐三菩提善男子如汝所言
聞惡聲故至三塗者是義不然何以故非以惡聲而
至三塗當知是果乃是惡心所以者何有善男子善
女人等雖聞惡聲心不生惡是故當知非因惡聲生
三趣中而諸衆生因煩惱結惡心滋多生三惡趣非
因惡聲若聲有定相諸有聞者一切悉應生於惡心
或有生者有不生者是故當知聲無定相以無定相

故雖復因之不生惡心世尊聲若無定云何菩薩昔
所不聞而今得聞善男子聲無定相昔所不聞今諸
菩薩而今得聞以是義故我作是說昔所不聞而今
得聞善男子云何昔所不見而今得見菩薩摩訶薩
修大涅槃微妙經典先取明相所謂日月星宿庭燎
燈燭珠火之明藥草等光以修習故得異眼根異於
聲聞緣覺所得云何爲異二乘所得清淨天眼若依
欲界四大眼根不見初禪若依初禪不見土地乃至
自眼猶不能見若欲多見極至三千大千世界菩薩
摩訶薩不修天眼見妙色身悉是骨相雖見他方恒

河沙等世界色相不作色相不作常相有相物相名字等相作因緣相不作見相不言是眼微妙淨相惟見因緣非因緣相云何因緣色是眼緣若使是色非因緣者一切凡夫不應生於見色之相以是義故名因緣非因緣者菩薩摩訶薩雖復見色不生色相是故非緣以是義故菩薩所得清淨天眼異於聲聞緣覺所得以是異故一時徧見十方世界現在諸佛是名菩薩眼所不見而今得見以是異故能見微塵聲聞緣覺所不能見以是異故雖見自眼初無見相見無常相見凡夫身三十六物不淨克滿如於掌中

觀阿摩勒果以是義故昔所不見而今得見若見衆生所有色相則知其人大小乘根一觸衣故亦知是人善惡諸根差別之相以是義故昔所不知而今得知以一見故昔所不知而今得知以此知故昔所不見而今得見善男子云何菩薩昔所不知而今得知菩薩摩訶薩雖知凡夫貪恚癡心初不作心及心數相不作衆生及以物相修第一義畢竟空相何以故一切菩薩常善修習空性相故以修空故昔所不知而今得知云何爲知知無有我無有我所知諸衆生皆有佛性以佛性故一闍提等捨離本心悉當得成

阿耨多羅三藐三菩提如此皆是聲聞緣覺所不能
知菩薩能知以是義故昔所不知而今得知復次善
男子云何昔所不知而今得知菩薩摩訶薩修大涅
槃微妙經典念過去世一切衆生所生種姓父母兄
弟妻子眷屬知識怨憎於一念中得殊異智異於聲
聞緣覺智慧云何爲異聲聞緣覺所有智慧念過去
世所有衆生種姓父母乃至怨憎而作種姓至怨憎
相菩薩不爾雖念過去種姓父母乃至怨憎終不生
於種姓父母怨憎等相常作法相空寂之相是名菩
薩昔所不知而今得知復次善男子云何昔所不知

而今得知菩薩摩訶薩修大涅槃微妙經典得他心
智異於聲聞緣覺所得云何爲異聲聞緣覺以一念
智知人心時則不能知地獄畜生餓鬼天心菩薩不
爾於一念中徧知六趣衆生之心是名菩薩昔所不
知而今得知復次善男子復有異知菩薩摩訶薩於
一心中知須陀洹初心次第至十六心以是義故昔
所不知而今得知是爲菩薩修大涅槃具足成就第
二功德復次善男子云何菩薩摩訶薩修大涅槃成
就具足第三功德善男子菩薩摩訶薩修大涅槃捨
慈得慈得慈之時不從因緣云何名爲捨慈得慈善

男子慈名世諦菩薩摩訶薩捨世諦故得第一義慈
不從緣得復次云何捨慈得慈慈若可捨名凡夫慈
慈若可得卽名菩薩無緣之慈捨一闡提慈犯重禁
慈謗方等慈作五逆慈得憐憫慈得如來慈世尊之
慈無因緣慈云何復名捨慈得慈捨黃門慈無根二
根女人之慈屠脍獵師畜養雞豬如是等慈亦捨聲
聞辟支佛慈得諸菩薩無緣之慈不見已慈不見他
慈不見持戒不見破戒雖自見悲不見衆生雖有苦
受不見受者何以故以修第一真實義故是名菩薩
修大涅槃成就具足第三功德復次善男子云何善

薩摩訶薩修大涅槃成就具足第四功德善男子善
薩摩訶薩修大涅槃成就具足第四功德有十事何
等爲十一者根深難可傾拔二者自身生決定想三
者不觀福田及非福田四者修淨佛土五者滅除有
餘六者斷除業緣七者修清淨身八者了知諸緣九
者離諸怨敵十者斷除二邊云何根深難可傾拔所
言根者名不放棄不放棄者爲是根所謂阿耨多
羅三藐三菩提根善男子一切諸佛諸善根本皆不
放棄不放棄故諸餘善根展轉增長以能增長諸善
根故於諸善中最爲殊勝善男子如諸迹中象迹爲

上不放逸法亦復如是於諸善法最爲殊勝善男子
如諸明中日光爲最不放逸法亦復如是於諸善法
最爲殊勝善男子如諸王中轉輪聖王爲最第一不
放逸法亦復如是於諸善法爲最第一善男子如諸
流中四河爲最不放逸法亦復如是於諸善法爲上
爲最善男子如諸山中須彌山王爲最第一不放逸
法亦復如是於諸善法爲最第一善男子如水生華
中青蓮爲最不放逸法亦復如是於諸善法爲最爲
上善男子如陸生華中婆利師華爲最爲上不放逸
法亦復如是於諸善法爲最爲上善男子如諸獸中

師子爲最不放逸法亦復如是於諸善法爲最爲上
善男子如飛鳥中金翅鳥王爲最爲上不放逸法亦
復如是於諸善法爲最爲上善男子如大身中羅睺
阿脩羅王爲最爲上不放逸法亦復如是於諸善法
爲最爲上善男子如一切衆生若二足四足多足無
足中如來爲最不放逸法亦復如是於善法中爲最
爲上善男子如諸衆中佛僧爲上不放逸法亦復如
是於善法中爲最爲上善男子如佛法中大涅槃法
爲最爲上不放逸法亦復如是於諸善法爲最爲上
善男子以是義故不放逸根深固難拔云何不放逸

故而得增長所謂信根戒根施根慧根忍根聞根進
根念根定根善知識根如是諸根不放棄故而得增
長以增長故深固難拔以是義故名爲菩薩摩訶薩
修大涅槃根深難拔云何於身作決定想於自身所
生決定心我今此身於未來世定當爲阿耨多羅三
藐三菩提器心亦如是不作陞小不作變易不作聲
聞辟支佛心不作魔心及自樂心樂生死心常爲衆
生求慈悲心是名菩薩於自身中生決定心我於來
世當爲阿耨多羅三藐三菩提器以是義故菩薩摩
訶薩修大涅槃於自身中生決定想云何菩薩不觀

福田及非福田云何福田外道持戒上至諸佛是名
福田若有念言如是等輩是真福田當知是心則爲
陞劣菩薩摩訶薩悉觀一切無量衆生無非福田何
以故以善修習異念處故有異念處善修習者觀諸
衆生無有持戒及以毀戒常觀諸佛世尊所說施雖
四種俱得淨報何等爲四一者施主清淨受者不淨
二者施主不淨受者清淨三者施受俱淨四者二俱
不淨云何施淨受者不淨施主具有戒聞智慧知有
惠施及以果報受者破戒專著邪見無施無報是名
施淨受者不淨云何名爲受者清淨施主不淨施主

破戒專著邪見言無惠施及以果報受者持戒多聞
智慧知有惠施及施果報是名施主不淨受者清淨
云何名爲施受俱淨施者受者俱有持戒多聞智慧
知有惠施及施果報是名施受二俱清淨云何名爲
二俱不淨施者受者破戒邪見言無有施及施果報
若如是者云何復言得淨果報以無施無報故名爲
淨善男子若有不見施及施報當知是人破戒
專著邪見若依聲聞言不見施及施果報是則名爲
破戒邪見若依如是大涅槃經不見惠施及施果報
是則名爲持戒正見菩薩摩訶薩有異念處以修習

故不見衆生持戒破戒施者受者及施果報是故得
名持戒正見以是義故菩薩摩訶薩不觀福田及非
福田云何名爲淨佛國土菩薩摩訶薩修大涅槃微
妙經典爲阿耨多羅三藐三菩提度衆生故離殺害
心以此善根願與一切衆生共之願諸衆生得壽命
長有大勢力獲大神通以是誓願因緣力故於未來
世成佛之時國土所有一切衆生得壽命長有大勢
力獲大神通復次善男子菩薩摩訶薩修大涅槃微
妙經典爲阿耨多羅三藐三菩提度衆生故離偷盜
心以此善根願與一切衆生共之願諸佛國土地所

有純是七寶衆生富足所欲自恣以此誓願因以力
故於未來世成佛之時所得國土純是七寶衆富足
所欲自恣復次善男子菩薩摩訶薩修大涅槃微妙
經典爲阿耨多羅三藐三菩提度衆生故離淫欲
心以此善根願與一切衆生共之願諸佛土所有衆
生無有貪欲瞋恚癡心亦無飢渴苦惱之患以是誓
願因緣力故於未來世成佛之時國土衆生遠離貪
淫瞋恚癡心一切無有飢渴苦惱復次善男子菩薩
摩訶薩修大涅槃微妙經典爲阿耨多羅三藐三菩
提度衆生故離妄語心以此善根願與一切衆生共

之願諸佛土常有華果茂林香樹所有衆生得妙音
聲以是誓願因緣力故於未來世成佛之時所有國
土常有華果茂林香樹其中衆生悉得清淨上妙音
聲復次善男子菩薩摩訶薩修大涅槃微妙經典爲
阿耨多羅三藐三菩提度衆生故遠離兩舌以此善
根願與一切衆生共之願諸佛土所有衆生常共和
合講說正法以是誓願因緣力故成佛之時國土所
有一切衆生悉共和合講論法要復次善男子菩薩
摩訶薩修大涅槃微妙經典爲阿耨多羅三藐三菩
提度衆生故遠離惡口以此善根願與一切衆生共

之願諸佛土地平如掌無有沙石荆棘惡刺所有衆生其心平等以是誓願因緣力故於未來世成佛之時所有國土地平如掌無有沙石荆棘惡刺所有衆生其心平等復次善男子菩薩摩訶薩修大涅槃微妙經典爲阿耨多羅三藐三菩提度衆生故離無義語以此善根願與一切衆生共之願諸佛土所有衆生無有苦惱以是誓願因緣力故於未來世成佛之時國土所有一切衆生無有苦惱復次善男子菩薩摩訶薩修大涅槃微妙經典爲阿耨多羅三藐三菩提度衆生故遠離貪嫉以此善根願與一切衆生共

之願諸佛土一切衆生無有貪嫉惱害邪見以是誓願因緣力故於未來世成佛之時國土所有一切衆生悉無貪嫉惱害邪見復次善男子菩薩摩訶薩修大涅槃微妙經典爲阿耨多羅三藐三菩提度衆生故遠離惱害以此善根願與一切衆生共之願諸佛土所有衆生悉共修習大慈大悲得一子地以是誓願因緣力故於未來世成佛之時世界所有一切衆生悉共修習大慈大悲得一子地復次善男子菩薩摩訶薩修大涅槃微妙經典爲阿耨多羅三藐三菩提度衆生故遠離邪見以此善根願與一切衆生共

之願諸國土所有衆生悉得摩訶般若波羅蜜以是
普願因緣力故於未來世成佛之時世界衆生悉得
受持摩訶般若波羅蜜是名菩薩修淨佛土云何菩
薩摩訶薩滅除有餘有餘有三一者煩惱餘報二者
餘業三者餘有善男子云何名爲煩惱餘報若有衆
生習近貪欲是報熟故墮於地獄從地獄出受畜生
身所謂鴿雀鴛鴦鸚鵡者婆者婆舍利伽烏青雀魚
鼈獼猴麀鹿若得人身受黃門形女人二根無根淫
女若得出家犯初重戒是名餘報復次善男子若有
衆生以殷重心習近瞋恚是報熟故墮於地獄從地

獄出受畜生身所謂毒蛇具四種毒見毒觸毒齧毒
噓毒師子虎狼能驚貓狸鷹鷂之屬若得人身具足
十六諸惡律儀若得出家犯第二重戒是名餘報復
次善男子若有修習愚癡之人是報熟時墮於地獄
從地獄出受畜生身所謂象猪牛羊水牛蚤蟲蝨蟲
蝘子等形若得人身聾盲瘖瘂癱殘背偻諸根不具
不能受法若得出家諸根暗鈍喜犯重戒乃至五錢
是名餘報復次善男子若有修習憍慢之人是報熟
時墮於地獄從地獄出受畜生身所謂蠶蟲駝驢犬
馬若生人中受奴婢身貧窮乞匄或得出家常爲衆

生之所輕賤破第四戒是名餘報如是等名煩惱餘報如是餘報菩薩摩訶薩以能修習大涅槃故悉得除滅云何餘業謂一切凡夫業一切聲聞業須陀洹人受七有業斯陀舍人受二有業阿那舍人受色有業是名餘業如是餘業菩薩摩訶薩以能修習大涅槃故悉得除斷云何餘有阿羅漢得阿羅漢果辟支佛得辟支佛果無業無結而轉二果是名餘有如是三種有餘之法菩薩摩訶薩修習大乘大涅槃經故得除滅是名菩薩摩訶薩滅除有餘云何菩薩修清淨身菩薩摩訶薩修不殺戒有五種心謂下中上上

上上中上乃至正見亦復如是是五十心名初發心具足決定成五十心是名滿足如是百心名百福德具足百福成於一相如是展轉具足成就三十二相名清淨身所以復修八十種好世有衆生事八十種神何等八十二日十二大天五大星北斗馬天行道天婆羅幢跋闍天功德天二十八宿地天風天水天火天梵天樓陀天因提天拘摩羅天八臂天摩醯耆羅天半闍羅天鬼子母天四天王天造書天婆藪天是名八十爲此衆生修八十好以自莊嚴是名菩薩清淨之身何以故是八十天一切衆生之所信伏

是故菩薩修八十好其身不動令彼衆生隨其所信
各各得見見已宗敬各發阿耨多羅三藐三菩提心
以是義故菩薩摩訶薩修於淨身善男子譬如有人
欲請大王要當莊嚴所有舍宅極令清淨辦具種種
百味肴饍然後王乃就其所請菩薩摩訶薩亦復如
是欲請阿耨多羅三藐三菩提法輪王故先當修身
極令清淨無上法王乃當處之以是義故菩薩摩訶
薩要當修於清淨之身善男子譬如有人欲服甘露
先當淨身菩薩摩訶薩亦復如是欲服無上甘露法
味般若波羅蜜要當先以八十種好清淨其身善男

子譬如妙好金銀寶器盛於淨水中表俱淨菩薩摩
訶薩其身清淨亦復如是盛阿耨多羅三藐三菩提
水中表俱淨善男子如波羅柰素白之衣易受染色
何以故性白淨故菩薩摩訶薩亦復如是以身淨故
疾得阿耨多羅三藐三菩提以是義故菩薩摩訶薩
修於淨身云何菩薩了知諸緣菩薩摩訶薩不見色
相不見色緣不見色體不見色生不見色滅不見一
相不見異相不見見者不見相貌不見受者何以故
了因緣故如色一切法亦如是是名菩薩了知諸緣
云何菩薩離諸怨敵一切煩惱是菩薩怨菩薩摩訶

薩常遠離故是名菩薩壞諸怨敵五住菩薩視諸煩惱不名爲怨所以者何因煩惱故菩薩有生以有生故故能展轉教化衆生以是義故不名爲怨何等爲怨所謂誹謗方等經者菩薩隨生不畏地獄畜生餓鬼惟畏如是謗方等者一切菩薩有八種魔名爲怨家遠是八魔名離怨家是名菩薩離諸怨敵云何菩薩遠離二邊言二邊者謂二十五有及愛煩惱菩薩常離二十五有及愛煩惱是名菩薩遠離二邊是名菩薩摩訶薩修大涅槃具足成就第四功德爾時光明徧照高貴德王菩薩摩訶薩言如佛所說若有菩

薩修大涅槃悉作如是十事功德如來何故惟修九事不修淨土佛言善男子我於往昔亦常具修如是十事一切菩薩及諸如來無有不修是十事者若使世界不淨克滿諸佛世尊於中出者無有是處善男子汝今莫謂諸佛出興不淨世界當知是心不善墮劣汝今當知我實不出閻浮提界譬如有人說言此界獨有日月他方世界無有日月如是之言無有義理若有菩薩發如是言此佛世界穢惡不淨他方佛土清淨莊嚴亦復如是善男子西方去此娑婆世界度三十二恒河沙等諸佛國土彼有世界名曰無勝

彼土何故名曰無勝其土所有莊嚴之事悉皆平等
無有差別猶如西方安樂世界亦如東方滿月世界
我於彼土出現於世爲化衆生故於此界闍浮提中
現轉法輪非但我身獨於此中現轉法輪一切諸佛
亦於此中而轉法輪以是義故諸佛世尊非不修行
如是十事善男子慈氏菩薩以誓願故當來之世令
此世界清淨莊嚴以是義故一切諸佛所有世界無
不嚴淨復次善男子云何菩薩修大涅槃微妙經典
具足成就第五功德善男子菩薩摩訶薩修大涅槃
具足成就第五功德有五事何等爲五一者諸根完

具二者不生邊地三者諸天愛念四者常爲天魔沙
門刹利婆羅門等之所恭敬五者得宿命智菩薩以
是大涅槃經因緣力故具足如是五事功德光明徧
照高貴德王菩薩言如佛所說若有善男子善女人
修於布施則得具成五事功德今云何言因大涅槃
得是五事佛言善哉善哉善男子如是之事其義各
異今當爲汝分別解說施得五事不定不常不淨不
勝不異非無漏不能利益安樂憐憫一切衆生若依
如是大涅槃經所得五事是定是常是淨是勝是異
是無漏則能利益安樂憐憫一切衆生善男子夫布

施者得離飢渴大涅槃經能令衆生悉得遠離二十
五有渴愛之病布施因緣令生死相續大涅槃經能
令生死斷不相續因布施故受凡夫法因大涅槃得
作菩薩布施因緣能斷一切貧窮苦惱大涅槃經能
斷一切貧善法者布施因緣有分有果因大涅槃得
阿耨多羅三藐三菩提無分無果是名菩薩修大涅
槃微妙經典具足成就第五功德復次善男子云何
菩薩修大涅槃微妙經典具足成就第六功德菩薩
摩訶薩修大涅槃得金剛三昧安住是中悉能破散
一切諸法見一切法皆是無常皆是動相恐怖因緣

病苦劫盜念念滅壞無有真實一切皆是魔之境界
無可見相菩薩摩訶薩住是三昧雖施衆生乃至不
見一衆生實爲衆生故精勤修習尸波羅蜜乃至修
習般若波羅蜜亦復如是菩薩若見有一衆生不能
畢竟具足成就檀波羅蜜乃至具足般若波羅蜜善
男子譬如金剛所擬之處無不碎壞而是金剛無有
折損金剛三昧亦復如是所擬之法無不碎壞而是
三昧無有折損善男子如諸寶中金剛最勝菩薩所
得金剛三昧亦復如是於諸三昧爲最第一何以故
菩薩摩訶薩修是三昧一切三昧悉來歸屬善男子

如諸小王悉來歸屬轉輪聖王一切三昧亦復如是
悉來歸屬金剛三昧善男子譬如有人爲國怨讎人
所厭患有人殺之一切世人無不稱讚是人功德金
剛三昧亦復如是菩薩修習能壞一切衆生怨敵是
故常爲一切三昧之所尊敬善男子譬如有人其力
盛壯人無當者復更有人力能伏之當知是人世所
稱美金剛三昧亦復如是力能摧伏難伏之法以是
義故一切三昧悉來歸屬善男子譬如有人在大海
浴當知是人已用諸河泉池之水菩薩摩訶薩亦復
如是修習如是金剛三昧當知已爲修習諸餘一切

三昧善男子如香山中有一泉水名阿耨達其泉具
足八味之水有人飲之無諸病苦金剛三昧亦復如
是具八正道菩薩修習斷諸煩惱瘡疣重病善男子
如人供養摩醯首羅當知是人已爲供養一切諸天
金剛三昧亦復如是有人修習當知已爲修習一切
諸餘三昧善男子若有菩薩安住如是金剛三昧見
一切法無有障闕如於掌中觀阿摩勒果菩薩雖復
得如是見終不作想見一切法善男子譬如有人坐
四衢道見諸衆生來去坐臥金剛三昧亦復如是見
一切法生滅出沒善男子譬如高山有人登之遠望

諸方皆悉明了金剛定山亦復如是菩薩登之遠望
諸法無不明了善男子譬如春月天降甘雨其沛微
緻間無空處淨眼之人見之明了菩薩亦爾得金剛
定清淨之目遠見東方所有世界其中或有國土成
壞一切皆見明了無障乃至十方亦復如是善男子
如由乾陀山七日竝出其山所有樹木叢林一切燒
盡菩薩修習金剛三昧亦復如是所有一切煩惱叢
林卽時消滅善男子譬如金剛雖能摧破一切有物
終不生念我能摧破金剛三昧亦復如是菩薩修已
能破煩惱終不生念我能壞結善男子譬如大地能

持萬物終不生念我力能持火亦不念我能燒物水
亦不念我能潤漬風亦不念我能動物空亦不念我
能容受涅槃亦復不生念言我今衆生而得滅度金
剛三昧亦復如是雖能滅除一切煩惱而初無心言
我能滅若有菩薩安住如是金剛三昧於一念中變
身如佛其數無量徧滿十方恒河沙等諸佛世界如
是菩薩雖作是化其心初無憍慢之想何以故菩薩
常念誰有是定能作是化惟有菩薩安住如是金剛
三昧乃能作耳菩薩摩訶薩安住如是金剛三昧於
一念中徧至十方恒河沙等諸佛世界還其本處雖

有是力亦不念言我能如是何以故以是三昧因緣力故菩薩摩訶薩安住如是金剛三昧於一念中能斷十方恒河沙等世界衆生所有煩惱而心初無斷諸衆生煩惱之想何以故以是三昧因緣力故菩薩住是金剛三昧以一音聲有所演說一切衆生各隨種類而得解了示現一色一切衆生各各皆見種種色相安住一處身不移易能令衆生隨其方面各各而見演說一法若界若入一切衆生各隨本解而得聞之菩薩安住如是三昧雖見衆生而心初無衆生之相雖見男女無男女相雖見色法無有色相乃至

見識亦無識相雖見晝夜無晝夜相雖見一切無一切相雖見一切煩惱諸結亦無一切煩惱之相見入聖道無聖道相雖見菩提無菩提相見於涅槃無涅槃相何以故善男子一切諸法本無相故菩薩以是三昧力故見一切法如本無相何故名爲金剛三昧善男子譬如金剛若在日中色則不定金剛三昧亦復如是在於大衆色亦不定是故名爲金剛三昧善男子譬如金剛一切世人不能平價金剛三昧亦復如是所有功德一切人天不能平量是故復名金剛三昧善男子譬如貧人得金剛寶卽得遠離貧窮困

苦惡鬼邪毒菩薩摩訶薩亦復如是得是三昧則能
遠離煩惱諸苦諸魔邪毒是故復名金剛三昧是名
菩薩修大涅槃具足成就第六功德

南本大般涅槃經卷第二十二

音釋

癩魯旱切稚直利切澀所立切漬疾智切羸力追切

憚羊益切戰慄戰之慄切良質庭燎庭燎燎力照切

草樹之於庭屠脍脍謂宰殺者隘胡夾切鼈并列

麀諸良切熊羆熊胡弓切波為鷓犬照切蠹音

文蝨莫切蝨莫切蝨莫切瘵力中切偃於武切駝徒何切句

古太切 藪蘇后切緻直利切

丹陽居士賀懋熙懋熙懋熒懋懋熒懋熒懋熒
先嚴賀學禮遺願施貴刻此
大般涅槃經第二十二卷 計字九千五百七
十五箇該銀四兩九錢七分七厘
宛陵釋如圭對長洲徐普書旌德劉邦瀛刻
萬曆丁巳歲春三月徑山化城寺識

南本大般涅槃經卷第二十三

北涼天竺三藏曇無讖譯梵

宋沙門慧嚴慧觀同謝靈運再治

高貴德王菩薩品第二十二之五

復次善男子云何菩薩摩訶薩修大涅槃微妙經典
具足成就第七功德善男子菩薩摩訶薩修大涅槃
微妙經典作是思惟何法能爲大般涅槃而作近因
菩薩卽知有四種法爲大涅槃而作近因若言勤修
一切苦行是大般涅槃近因緣者是義不然所以者
何若離四法得涅槃者無有是處何等爲四一者親

近善友二者專心聽法三者繫念思惟四者如法修行善男子譬如有人身遇眾病若熱若冷虛勞下瘧眾邪鬼毒至良醫所良醫卽爲隨病說藥是人至心善受醫教隨教合藥如法服之服已病愈身得安樂有病之人譬諸菩薩大良醫者譬善知識良醫所說譬方等經善受醫教譬善思惟方等經義隨教合藥譬如法修行三十七助道之法病除愈者譬滅煩惱得安樂者譬得涅槃常樂我淨善男子譬如王欲如法治令民安樂咨諸智臣其法云何諸臣卽以先王舊法而爲說之王旣聞已至心信行如法治國無

諸怨敵是故令民安樂無患善男子王者譬諸菩薩諸智臣者譬善知識智臣爲王所說治法譬十二部經王旣聞已至心信行譬諸菩薩繫心思惟十二部經所有深義如法治國譬諸菩薩如法修行所謂六波羅蜜以能修習六波羅蜜故無諸怨敵譬諸菩薩已離諸結煩惱惡賊得安樂者譬諸菩薩得大涅槃常樂我淨善男子譬如有人遇惡癩病有善知識而語之言汝若能至須彌山邊病可得差所以者何彼有良藥味如甘露若能服者病無不差其人至心信是事已卽往彼山采服甘露其病除愈身得安樂惡

癩病者譬諸凡夫善知識者譬諸菩薩摩訶薩等至
心信受譬四無量心須彌山者譬入聖道甘露味者
譬於佛性癩病除愈譬滅煩惱得安樂者譬得涅槃
常樂我淨善男子譬如有人畜諸弟子聰明大智是
人晝夜常教不倦諸菩薩等亦復如是一切衆生有
信不信而常教化無有疲厭善男子善知識者所謂
佛菩薩辟支佛聲聞人中信方等者何故名爲善知
識耶善知識者能教衆生遠離十惡修行十善以是
義故名善知識復次善知識者如法而說如說而行
云何名爲如法而說如說而行自不殺生教人不殺

乃至自行正見教人正見若能如是則得名爲眞善
知識自修菩提亦能教人修行菩提以是義故名善
知識自能修行信戒布施多聞智慧亦能教人信戒
布施多聞智慧復以是義名善知識善知識者有善
法故何等善法所作之事不求自樂常爲衆生而求
安樂見他有過不訟其短口常宣說淳善之事以是
義故名善知識善男子如空中月從初一日至十五
日漸漸增長善知識者亦復如是令諸學人漸遠惡
法增長善法善男子若有親近善知識者本未有戒
定慧解脫解脫知見卽便有之未具足者則得增廣

何以故以其親近善知識故因是親近復得了達十二部經甚深之義若能聽是十二部經甚深義者名爲聽法聽法者則是大乘方等經典聽方等經名眞聽法眞聽法者卽是聽受大涅槃經大涅槃中聞有佛性如來畢竟不般涅槃是故名爲專心聽法專心聽法名入聖道以入聖道能斷貪欲瞋恚愚癡故名聽法夫聽法者名十一空以此諸空於一切法不作相貌夫聽法者名初發心乃至究竟阿耨多羅三藐三菩提心以因初心得大涅槃不以聞故得大涅槃以修習故得大涅槃善男子譬如病人雖聞醫教及

藥名字不能愈病要以服故乃得除差雖聽十二深因緣法不能斷滅一切煩惱要以繫念善思惟故能得除斷是名第三繫念思惟復以何義名繫念思惟所謂三三昧空三昧無相三昧無作三昧空者於二十五有不見一實無作者於二十五有不作願求無相者無有十相所謂色相聲相香相味相觸相生相住相滅相男相女相修習如是三三昧者是名菩薩繫念思惟云何名爲如法修行如法修行卽是修行檀波羅蜜乃至般若波羅蜜知陰入界眞實之相亦知聲聞緣覺諸佛同於一道而般涅槃法者卽是常

樂我淨不生不老不病不死不飢不渴不苦不惱不退不沒善男子解大涅槃甚深義者則知諸佛終不畢竟入於涅槃善男子第一真實善知識者所謂菩薩諸佛世尊何以故常以三種善調御故何等爲三一者畢竟軟語二者畢竟訶責三者軟語訶責以是義故菩薩諸佛卽是真實善知識也復次善男子佛及菩薩爲大醫故名善知識何以故知病知藥應病授藥故譬如良醫善八種術先觀病相相有三種何等爲三謂風熱水風病之人授之酥油熱病之人授之石蜜水病之人授之薑湯以知病根授藥得差故

名良醫佛及菩薩亦復如是知諸凡夫病有三種一者貪欲二者瞋恚三者愚癡貪欲病者教觀骨相瞋恚病者觀慈悲相愚癡病者觀十二因緣相以是義故諸佛菩薩名善知識善男子譬如船師善度人故名大船師諸佛菩薩亦復如是度諸衆生生死大海以是義故名善知識復次善男子因佛菩薩令諸衆生具足修得善法根本故善男子譬如雪山乃是種種微妙上藥根本之處佛及菩薩亦復如是悉是一切善根本處以是義故名善知識善男子雪山之中有上香藥名曰娑訶有人見之得壽無量無有病苦

雖有四毒不能中傷若有觸者增長壽命滿百二十
若有念者得宿命智何以故藥勢力故諸佛菩薩亦
復如是若有見者即得斷除一切煩惱雖有四魔不
能于亂若有觸者命不可夭不死不退不沒所
謂觸者若在佛邊聽受妙法若有念者得阿耨多羅
三藐三菩提以是義故諸佛菩薩各善知識善男子
如香山中有阿耨達池由是池故有四大河所謂恒
河辛頭私陀博叉世間衆生常作是言若有罪者浴
此四河衆罪得滅當知此言虛妄不實除此已往何
等爲實諸佛菩薩是乃爲實所以者何若人親近則

得滅除一切衆罪以是義故名善知識復次善男子
譬如大地所有藥木一切叢林百穀甘蔗華果之屬
值天炎旱將欲枯死難陀龍王及婆難陀憐憫衆生
從大海出降注甘雨一切叢林百穀草木滋潤還生
一切衆生亦復如是所有善根將欲消滅諸佛菩薩
生大慈悲從智慧海降甘露雨令諸衆生具足還得
十善之法以是義故諸佛菩薩各善知識善男子譬
如良醫善八種術見諸病人不觀種姓端正醜陋錢
財寶貨悉爲治之是故世稱爲大良醫諸佛菩薩亦
復如是見諸衆生有煩惱病不觀種姓端正醜陋錢

財寶貨生慈憫心悉爲說法衆生聞已煩惱病除以是義故諸佛菩薩名善知識以是親近善友因緣則得近於大般涅槃云何菩薩聽法因緣而得近於大般涅槃一切衆生以聽法故則具信根得信根故樂行布施戒忍精進禪定智慧得須陀洹果乃至佛果是故當知得諸善法皆是聽法因緣勢力善男子譬如長者惟有一子遣至他國市易所須示其道路通塞之處而復戒之若遇淫女慎莫親愛若親愛者喪身殞命及以財寶弊惡之人亦莫交游其子敬順父之教勅身心安隱多獲寶貨菩薩摩訶薩爲諸衆生

敷演法要亦復如是示諸衆生及四部衆諸道通塞是諸衆等以聞法故遠離諸惡具足諸法以是義故聽法因緣則得近於大般涅槃善男子譬如明鏡照人面像無不明了聽法明鏡亦復如是有人照之則見善惡明了無翳以是義故聽法因緣則得近於大般涅槃善男子譬如商人欲至寶渚不知道路有人示之其人隨語卽至寶渚多獲諸珍不可稱計一切衆生亦復如是欲至善處采求法寶不知其路通塞之相菩薩示之衆生隨已得至善處獲得無上大涅槃寶以是義故聽法因緣則得近於大般涅槃善男

子譬如醉象狂逸暴惡多欲殺害有調象師以大鐵
鉤鉤擱其頂卽時調順惡心都盡一切衆生亦復如
是貪欲瞋恚愚癡醉故欲多造惡諸菩薩等以聞法
鉤擱之令住更不得起造諸惡心以是義故聽法因
緣則得近於大般涅槃是故我於處處經中說我弟
子專心聽受十二部經則離五蓋修七覺分以是修
習七覺分故則得近於大般涅槃以聽法故須陀洹
人離諸恐怖所以者何須達長者身遭重病心大愁
怖聞舍利弗說須陀洹有四功德十種慰喻聞是事
已恐怖卽除以是義故聽法因緣則得近於大般涅

槃何以故開法眼故世有三人一者無目二者一目
三者二目無目之人常不聞法一目之人雖暫聞法
其心不住二目之人專心聽受如聞而行以聽法故
得知世間如是三人以是義故聽法因緣則得近於
大般涅槃善男子如我昔在拘尸那城時舍利弗身
遇病苦我時顧命阿難廣爲說法時舍利弗聞是事
已告四弟子汝昇我牀往至佛所我欲聽法時四弟
子奉命昇往卽得聞法聞法力故所苦除差身得安
隱以是義故聽法因緣則得近於大般涅槃云何菩
薩思惟因緣而得近於大般涅槃因是思惟心得解

脫何以故一切衆生常爲五欲之所繫縛以思惟故
悉得解脫以是義故思惟因緣則得近於大般涅槃
復次善男子一切衆生常爲常樂我淨四法之所顛
倒以思惟故得見諸法無常無樂無我無淨如是見
已四倒即斷以是義故思惟因緣則得近於大般涅
槃復次善男子一切諸法有四種相何等爲四一者
生相二者老相三者病相四者滅相以是四相能令
一切凡夫衆生至須陀洹生大苦惱若能繫念善思
惟者雖遇此四不生衆苦以是義故思惟因緣則得
近於大般涅槃復次善男子一切善法無不因是思

惟而得何以故有人雖於無量無邊阿僧祇劫專心
聽法若不思惟終不能得阿耨多羅三藐三菩提以
是義故思惟因緣則得近於大般涅槃復次善男子
若有衆生信佛法僧無有變易而生恭敬當知皆是
繫念思惟因緣力故因得斷除一切煩惱以是義故
思惟因緣則得近於大般涅槃云何菩薩如法修行
善男子斷諸惡法修習善法故名菩薩如法修行復
次云何如法修行見一切法空無所有無常無樂無
我無淨以是見故寧捨身命不犯禁戒是名菩薩如
法修行復次云何如法修行修有二種一者真實二

者不實不實者不知涅槃佛性如來法僧實相虛空
等相是名不實云何真實能知涅槃佛性如來法僧
實相虛空等相是名真實云何名爲知涅槃相涅槃
之相凡有八事何等爲八一者盡二善性三實四真
五常六樂七我八淨是名涅槃復有八事何等爲八
一者解脫二者善性三者不實四者不真五者無常
六者無樂七者無我八者無淨復有六相一者解脫
二者善性三者不實四者不真五者安樂六者清淨
若有衆生依世俗道斷煩惱者如是涅槃則有八事
解脫不實何以故不常故以無常故則無有實無有

實故則無有真雖斷煩惱以還起故無常無我無樂
無淨是名涅槃解脫八事云何六相聲聞緣覺斷煩
惱故名爲解脫而未能得阿耨多羅三藐三菩提故
名不實以不實故名爲不真未來之世當得阿耨多
羅三藐三菩提故名無常以得無漏入聖道故名爲
淨樂善男子若如是知是知涅槃不名佛性如來法
僧實相虛空云何菩薩知於佛性佛性有六何等爲
六一常二淨三實四善五當見六真復有七事一者
可證餘六如上故名菩薩知於佛性云何菩薩知如
來相如來卽是覺相善相常樂我淨解脫真實示道

可見是名菩薩知如來相云何菩薩知於法相法者
若善不善若常不常若樂不樂若我無我若淨不淨
若知不知若解不解若真不真若修不修若師非師
若實不實是名菩薩知於法相云何菩薩知於僧相
僧者常樂我淨是弟子相可見之相善真不實何以
故一切聲聞得佛道故何故名真悟法性故是名菩
薩知於僧相云何菩薩知於實相實相者若常無常
若樂無樂若我無我若淨無淨若善不善若有若無
若涅槃非涅槃若解脫非解脫若知不知若斷不斷
若證不證若修不修若見不見是名實相非是涅槃

佛性如來法僧虛空是名菩薩因修如是大涅槃故
知於涅槃佛性如來法僧實相虛空等法差別之相
善男子菩薩摩訶薩修大涅槃微妙經典不見虛空
何以故佛及菩薩雖有五眼所不見故惟有慧眼乃
能見之慧眼所見無法可見故名爲見若是無物名
虛空者如是虛空乃名爲實以是實故則名常無以
常無故無樂我淨善男子空名無法無法名空譬如
世間無物名空虛空之性亦復如是無所有故名爲
虛空善男子眾生之性與虛空性俱無實性何以故
如人說言除滅有物然後作空而是虛空實不可作

何以故無所有故以無有故當知無空是虛空性若
可作者則名無常若無常者不名虛空善男子如世
間人說言虛空無色無闕常不變易是故世稱虛空
之性爲第五大善男子而是虛空實無有性以光明
故故名虛空實無虛空猶如世諦實無其性爲衆生
故說有世諦善男子涅槃之體亦復如是無有住處
直是諸佛斷煩惱處故名涅槃涅槃卽是常樂我淨
涅槃雖樂非是受樂乃是上妙寂滅之樂諸佛如來
有二種樂一寂滅樂二覺知樂實相之體有三種樂
一者受樂二寂滅樂三覺知樂佛性一樂以當見故

得阿耨多羅三藐三菩提時名菩提樂爾時高貴德
王菩薩摩訶薩白佛言世尊若煩惱斷處是涅槃者
是事不然何以故如來往昔初成佛道至尼連禪河
邊爾時魔王與其眷屬到於佛所而作是言世尊涅
槃時至何故不入佛告魔王我今未有多聞弟子善
持禁戒聰明利智能化衆生是故不入若言煩惱斷
處是涅槃者諸菩薩等於無量劫已斷煩惱何故不
得稱爲涅槃俱是斷處何緣獨稱諸佛有之菩薩無
耶若斷煩惱非涅槃者何故如來昔告生名婆羅門
言我今此身卽是涅槃如來又時在毗舍離國魔復

啓請如來昔以未有弟子多聞持戒聰明利智能化衆生不入涅槃今已具足何故不入如來爾時卽告魔言汝今莫生悞遲之想却後三月吾當涅槃世尊若使滅度非涅槃者何故如來自期三月當般涅槃世尊若斷煩惱是涅槃者如來往昔初在道場菩提樹下斷煩惱時便是涅槃何故復言却後三月當般涅槃世尊若使爾時涅槃者云何方爲拘尸那城諸力士等說言後夜當般涅槃如來誠實云何發是虛妄之言爾時世尊告光明徧照高貴德王菩薩摩訶薩云善男子若言如來得廣長舌當知如來於無量

劫已離妄語一切諸佛及諸菩薩凡所發言誠諦無虛善男子如汝所言波旬往昔啓請於我入涅槃者善男子而是魔王真實不知涅槃定相何以故波旬意謂不化衆生默然而住便是涅槃善男子譬如世人見人不言無所造作便謂是人如死無異魔王波旬亦復如是意謂如來不化衆生默無所說便謂如來入般涅槃善男子如來不說佛法衆僧無差別相惟說常住清淨二法無差別耳善男子佛亦不說佛及佛性涅槃無差別相惟說常恆不變無差別耳善男子佛亦不說涅槃實相無差別相惟說常有實不

變易無差別耳善男子爾時我諸聲聞弟子生於淨
訟如拘睭彌諸惡比丘違反我教多犯禁戒受不淨
物貪求利養向諸白衣而自讚歎我得無漏謂須陀
洹果乃至我得阿羅漢果毀辱他人於佛法僧戒律
和尚不生恭敬公於我前言如是物佛所聽畜如是
等物佛不聽畜我卽語言如是等物我實不聽復反
我言如是等物實是佛聽如是惡人不信我言爲是
等故我告波旬汝莫悞遲却後三月當般涅槃善男
子因如是等惡比丘故令諸聲聞受學弟子不見我
身不聞我法便言如來入於涅槃惟諸菩薩能見我

身常聞我法是故不言我入涅槃聲聞弟子雖復發
言如來涅槃而我實不入於涅槃善男子若我所有
聲聞弟子說言如來入涅槃者當知是人非我弟子
是魔伴黨邪見惡人非正見也若言如來不入涅槃
當知是人真我弟子非魔伴黨正見之人非惡邪也
善男子我初不見弟子之中有言如來不化衆生默
然而住名般涅槃也善男子譬如長者多有子息捨
至他方未得還頃諸子咸謂父已長逝而是長者實
不終沒諸子顛倒皆生沒想聲聞弟子亦復如是不
見我故便謂如來已於拘尸城娑羅雙樹間而般涅

槃而我實不般涅槃也聲聞弟子生涅槃想善男子
譬如明燈有人覆之餘不知者謂燈已滅而是明炎
實亦不滅以不知故生於滅想聲聞弟子亦復如是
雖有慧眼以煩惱覆令心顛倒不見真身而便妄生
滅度之想而我實不畢竟滅度善男子如生盲人
見日月以不見故不知晝夜明暗之相以不知故便
說無有日月之實實有日月盲者不見以不見故而
生倒想言無日月聲聞弟子亦復如是如彼生盲不
見如來便謂如來入於涅槃如來實不入於涅槃以
倒想故生如是心善男子譬如雲霧覆蔽日月癡人

便言無有日月日月實有直以覆故衆生不見聲聞
弟子亦復如是以諸煩惱覆智慧眼不見如來便言
如來入於滅度善男子直是如來現嬰兒行非滅度
也善男子如閻浮提日入之時衆生不見以黑山障
故而是日性實無沒入衆生不見生沒入想聲聞弟
子亦復如是爲諸煩惱山所障故不見我身以不見
故便於如來生滅度想而我實不畢竟永滅是故我
於毗舍離國告波旬言却後三月我當涅槃善男子
如來懸見迦葉菩薩却後三月善根當熟亦見香山
須跋陀羅竟安居已當至我所是故我告魔王波旬

却後三月當般涅槃善男子有諸力士其數五百終竟三月亦當得發阿耨多羅三藐三菩提心我爲是故告波旬言却後三月當般涅槃善男子如純陀等及五百離車菴羅果女却後三月無上道心善根成熟爲是等故我告波旬却後三月當般涅槃善男子須那刹多親近外道尼捷子等我爲說法滿十二年彼人邪見不信不受我知是人邪見根栽却後三月定可拔斷我爲是故告波旬言却後三月當般涅槃善男子何因緣故我於往昔尼連河邊告魔王波旬我今未有多聞弟子是故不得入於涅槃我時欲爲五

比丘等於波羅柰轉法輪故次復欲爲五比丘等所謂耶奢富那毗摩羅闍憍梵波提須婆曠次復欲爲郁伽長者等五十人次復欲爲摩伽陀國頻婆娑羅王等無量人天次復欲爲優樓頻螺迦葉門徒五百比丘次復欲爲那提迦葉伽耶迦葉兄弟二人及五百弟子次復欲爲舍利弗目犍連等二百五十比丘轉妙法輪是故我告魔王波旬不般涅槃善男子有名涅槃非大涅槃云何涅槃非大涅槃不見佛性而斷煩惱是名涅槃非大涅槃以不見佛性故無常無我惟有樂淨以是義故雖斷煩惱不得名爲大般涅槃

槃若見佛性能斷煩惱是則名爲大般涅槃以見佛性故得名爲常樂我淨以是義故斷除煩惱亦得稱爲大般涅槃善男子涅槃者言不槃者言織不織之義名爲涅槃又槃言覆不覆之義乃名涅槃槃言去來不去不來乃名涅槃槃者言取不取之義乃名涅槃槃言不定定無不定乃名涅槃槃言新故無新故義乃名涅槃槃言障礙無障礙義乃名涅槃善男子有優樓迦毗羅弟子等言槃者名相無相之義乃名涅槃善男子槃者言有無有之義乃名涅槃槃名和合無和合義乃名涅槃槃者言苦無苦之義乃名涅槃

槃善男子斷煩惱者不名涅槃不生煩惱乃名涅槃善男子諸佛如來煩惱不起是名涅槃所有智慧於法無礙是爲如來如來非是凡夫聲聞緣覺菩薩是名佛性如來身心智慧徧滿無量無邊阿僧祇土無所障闕是名虛空如來常住無有變易名曰實相以是義故如來實不畢竟涅槃是名菩薩修大涅槃微妙經典具足成就第七功德善男子云何菩薩摩訶薩修大涅槃微妙經典具足成就第八功德善男子菩薩摩訶薩修大涅槃除斷五事遠離五事成就六事修習五事守護一事親近四事信順一實心善解

脫慧善解脫善男子云何菩薩除斷五事所謂五陰
色受想行識所言陰者其義何謂能令衆生生死相
續不離重檐分散聚合三世所攝求其實義了不可
得以是諸義故名爲陰菩薩摩訶薩雖見色陰不見
其相何以故於十色中推求其性悉不可得爲世界
故說言爲陰受有百八雖見受陰初無受相何以故
受雖百八理無定實是故菩薩不見受陰想行識等
亦復如是菩薩摩訶薩深見五陰是生煩惱諸惡根
本以是義故方便令斷云何菩薩遠離五事所謂五
見何等爲五一者身見二者邊見三者邪見四者戒

取五者見取因是五見生六十二見因是諸見生死
不絕是故菩薩防護不近云何菩薩成就六事謂六
念處何等爲六一者念佛二者念法三者念僧四者
念天五者念施六者念戒是名菩薩成就六事云何
菩薩修習五事所謂五定一者知定二者寂定三者
身心受快樂定四者無樂定五者首楞嚴定修習如
是五種定心則得近於大般涅槃是故菩薩勤心修
習云何菩薩守護一事謂菩提心菩薩摩訶薩常勤
守護是菩提心猶如世人守護一子亦如瞎者護餘
一目如行曠野守護導者菩薩守護菩提之心亦復

如是因護如是菩提心故得阿耨多羅三藐三菩提
因得阿耨多羅三藐三菩提故常樂我淨具足而有
卽是無上大般涅槃是故菩薩守護一法云何菩薩
親近四事謂四無量心何等爲四一者大慈二者大
悲三者大喜四者大捨因是四心能令無量無邊衆
生發菩提心是故菩薩繫心親近云何菩薩信順一
實菩薩了知一切衆生皆歸一道一道者謂大乘也
諸佛菩薩爲衆生故分之爲三是故菩薩信順不逆
云何菩薩心善解脫貪恚癡心永斷滅故是故菩薩
心善解脫云何菩薩慧善解脫菩薩摩訶薩於一切

法知無障闕是名菩薩慧善解脫因慧解脫昔所不
聞而今得聞昔所不見而今得見昔所不至而今得
至爾時光明徧照高貴德王菩薩摩訶薩言世尊如
佛所說心解脫者是義不然何以故心本無繫所以
者何是心本性不爲貪欲瞋恚愚癡諸結所縛若本
無繫云何而言心善解脫世尊若心本性不爲貪結
之所繫者何等因緣而能得繫如人構角本無乳相
雖加功力乳無由出犖於乳者則不如是加功雖少
乳則多出心亦如是本無貪者今云何有若本無貪
後方有者諸佛菩薩本無貪相今悉應有世尊譬如

石女本無子相雖加功力無量因緣子不可得心亦如是本無貪相雖造眾緣貪無由生世尊如鑽濕木火不可得心亦如是雖復鑽求貪不可得云何貪結能繫於心世尊譬如壓沙油不可得心亦如是雖復壓之貪不可得當知貪心二理各異設復有之何能汙心世尊譬如有人安瓶於空終不得住安貪於心亦復如是種種因緣不能令貪繫縛於心世尊若心無貪名解脫者諸佛菩薩何故不拔虛空中刺世尊過去世心不名解脫未來世心亦無解脫現在世心不與道共何等世心名得解脫世尊如過去燈不能

滅闇未來世燈亦不滅闇現在世燈復不滅闇何以故明之與闇二不並故心亦如是云何而言心得解脫世尊貪亦是有若貪無者見女相時不應生貪若因女相而得生者當知是貪真實而有以有貪故墮三惡道世尊譬如有人見畫女像亦復空貪以生貪故得種種罪若本無貪云何見畫而生於貪若心無貪云何如來說言菩薩心得解脫若心有貪云何見相然後方生不見相者則不生耶我今現見有惡果報當知有貪瞋恚愚癡亦復如是世尊譬如眾生有身無我而諸凡夫橫計我想雖有我想不墮三趣云

何貪者於無女相而起女想墮三惡道世尊譬如鑽
火而生於火然是火性眾緣中無以何因緣而得生
耶世尊貪亦如是色中無貪香味觸法亦復無貪云
何於色香味觸法而生貪耶若眾緣中悉無貪者云
何眾生獨生於貪諸佛菩薩而不生耶世尊心亦不
定若心定者無有貪欲瞋恚愚癡若不定者云何而
言心得解脫貪亦不定若不定者云何因之生三惡
趣貪者境界二俱不定何以故俱緣一色或生於貪
或生於瞋或生愚癡是故貪者及與境界二俱不定
若俱不定何故如來說言菩薩修大涅槃心得解脫

爾時世尊告光明徧照高貴德王菩薩摩訶薩言善
哉善哉善男子心亦不爲貪結所繫亦非不繫非是
解脫非不解脫非有非無非現在非過去非未來何
以故善男子一切諸法無自性故善男子有諸外道
作如是言因緣和合則有果生若眾緣中本無生性
而能生者虛空不生亦應生果虛空不生非是因故
以眾緣中本有果性是故合集而得生果所以者何
如提婆達欲造牆壁則取泥土不取采色欲造畫像
則集采色不取草木作衣取縷不取泥木作舍取泥
不取縷縷以人取故當知是中各能生果以能生果

故當知因中必先有性若無性者一物之中應當出生一切諸物若是可取可作可出當知是中必先有果若無果者人則不取不作不出惟有虛空無取無作故能出生一切萬物以有因故如尼拘陀子住尼拘陀樹乳有醍醐縷中有布泥中有瓶善男子一切凡夫無明所盲作是定說色有著義心有貪性復言凡夫心有貪性亦解脫性遇貪因緣心則生貪若遇解脫心則解脫雖作此說是義不然有諸凡夫復作是言一切因中悉無有果因有二種一者微細二者麤大細則是常麤則無常從微細因轉成麤因從此

麤因轉復成果麤無常故果亦無常善男子有諸凡夫復作是言心亦無因貪亦無因以時節故則生貪心如是等輩以不能知心因緣故輪迴六趣具受生死善男子譬如枷犬繫之於柱終日繞柱不能得離一切凡夫亦復如是被無明枷繫生死柱繞二十五有不能得離善男子譬如有人墮於圜廁既得出已而復還入如人病差還爲病因如人涉路值空曠處既得過已而復還來又如淨洗還塗泥土一切凡夫亦復如是已得解脫無所有處惟未得脫非非想處而復還來至三惡趣何以故一切凡夫惟觀於果不

觀因緣如大逐塊不逐於人凡夫之人亦復如是惟
觀於果不觀於因緣以不觀故從非想退還三惡趣
善男子諸佛菩薩終不定說因中有果因中無果及
有無果非有非無果若言因中先定有果及定無果
定有無果定非有非無果當知是等皆魔伴黨繫屬
於魔卽是愛人如是愛人不能永斷生死繫縛不知
心相及以貪相善男子諸佛菩薩顯示中道何以故
雖說諸法非有非無而不決定所以者何因眼因色
因明因心因念識則得生是識決定不在眼中色中
明中心中念中亦非中間非有非無從緣生故名之

爲有無自性故名之爲無是故如來說言諸法非有
非無善男子諸佛菩薩終不定說心有淨性及不淨
性淨不淨心無住處故從緣生貪故說非無本無貪
性故說非有善男子從因緣故心則生貪從因緣故
心則解脫善男子因緣有二一者隨於生死二者隨
大涅槃善男子有因緣故心共貪生共貪俱滅有不共貪生
貪生不共貪滅有不共貪生共貪俱滅有不共貪生
不共貪滅云何心共貪生共貪俱滅善男子若有凡
夫未斷貪心修習貪心如是一人心共貪生心共貪
滅一切衆生不斷貪心心共貪生心共貪滅如欲界

衆生一切皆有初地味禪若修不修常得成就遇因緣故即便得之言因緣者謂火災也一切凡夫亦復如是若修不修心共貪生心共貪滅何以故不斷貪故云何心共貪生不共貪滅聲聞弟子有因緣故生於貪心畏貪心故修白骨觀是名心共貪生不共貪滅復有心共貪生不共貪滅如聲聞人未證四果有因緣故生於貪心證四果時貪心得滅是名心共貪生不共貪滅菩薩摩訶薩得不動地時心共貪生不共貪滅云何不共貪生共貪俱滅若菩薩摩訶薩斷貪心已爲衆生故示現有貪以示現故能令無量無

邊衆生諮受善法具足成就是名不共貪生共貪俱滅云何不共貪生不共貪滅謂阿羅漢緣覺諸佛除不動地其餘菩薩是名不共貪生不共貪滅以是義故諸佛菩薩不決定說心性本淨性本不淨善男子是名不與貪結和合亦復不與瞋癡和合善男子譬如日月雖爲煙塵雲霧及羅睺羅之所覆蔽以是因緣令諸衆生不能得見雖不可見日月之性終不與彼五翳和合心亦如是以因緣故生於貪結衆生雖說心與貪合而是心性實不與合若是貪心卽是貪性若是不貪卽不貪性不貪之心不能爲貪貪結之

心不能不貪善男子以是義故貪欲之結不能汙心
諸佛菩薩永破貪結是故說言心得解脫一切衆生
從因緣故生於貪結從因緣故心得解脫善男子譬
如雪山懸峻之處人與獼猴俱不能行或復有處獼
猴能行人不能行或復有處人與獼猴二俱能行善
男子人與獼猴能行處者如諸獵師純以麪膠置之
案上用捕獼猴獼猴凝故往手觸之觸已黏手欲脫
手故以腳踏之腳復隨着欲脫腳故以口嚙之口復
黏着如是五處悉無得脫於是獵師以杖貫之負還
歸家雪山險處譬佛菩薩所得正道獼猴者譬諸凡

夫獵師者譬魔波旬麪膠者譬貪欲結人與獼猴俱
不能行者譬諸凡夫魔王波旬俱不能行獼猴能行
人不能者譬諸外道有智慧者諸惡魔等雖以五欲
不能繫縛人與獼猴俱能行者一切凡夫及魔波旬
常處生死不能修行凡夫之人五欲所縛令魔波旬
自在將去如彼獵師羈捕獼猴負之歸家善男子譬
如國王安住已界身心安樂若至他界則得衆苦一
切衆生亦復如是若能自住於已境界則得安樂若
至他界則遇惡魔受諸苦惱自境界者謂四念處他
境界者謂五欲也云何名爲繫屬於魔有諸衆生無

常見常常見無常苦見於樂樂見於苦不淨見淨淨見不淨無我見我我見無我非實解脫妄見解脫真實解脫見非解脫非乘見乘乘見非乘如是之人名繫屬魔繫屬魔者心不清淨復次善男子若見諸法真實是有總別定相者當知是人若見色時便作色相乃至見識亦作識相見男男相見女女相見日日相見月月相見歲歲相見陰陰相見入入相見界界相如是見者名繫屬魔繫屬魔者心不清淨復次善男子若見我是色色中有我我中有色色屬於我乃至見我是識識中有我我中有識識屬於我如是見

者繫屬於魔非我弟子善男子我聲聞弟子遠離如來十二部經修習外道種種典籍不修出家寂滅之業純營世俗在家之事何等名爲在家之事受畜一切不淨之物奴婢田宅象馬車乘驢騾雞犬獼猴豬羊種種穀麥遠離師僧親附白衣違反聖教向諸白衣作如是言佛聽比丘受畜種種不淨之物是名修習在家之事有諸弟子不爲涅槃但爲利養親近聽受十二部經招提僧物及僧鬘物衣著貪噉如自己有慳惜他家及以稱譽親近國王及諸王子卜筮吉凶推步盈虛圍碁六博擣菹投壺親比丘尼及諸處

女畜二沙彌常遊屠獵沽酒之家及旃陀羅所住之處種種販賣手自作食受使鄰國通致信命如是之人當知卽是魔之眷屬非我弟子以是因緣心共貪生心共貪滅乃至癡心共生共滅亦復如是善男子以是因緣心性非淨亦非不淨是故我說心得解脫若有不受不畜一切不淨之物爲大涅槃受持讀誦十二部經書寫解說當知是等真我弟子不行惡魔波旬境界卽是修習三十七品以修習故不共貪生不共貪滅是名菩薩修大涅槃微妙經典具足成就第八功德

南本大般涅槃經卷第二十三

校謄

第二十四紙五行南藏心作

音釋

瘡魚約切癩落蓋切鈎居侯切擗羊諸切悒於汲切瞋惡疾也鈎尺角切昇對舉也悒憂也瞋失井瞍許鑿切犖古候切鑽祖官切

椶其月切縷縷力主切私初吏切團團七情切廁木段也縷箭切與線同團團七情切廁糞也瞋目盲也犖牛羊乳也鑽穿也

榻徒訪問也皦私閏切鵜五知切黏女廉切也徒合切皦高也鵜膠古肴切黏相連著

擗徒丑居切蒲蒲薄擗徒覽切圍碁博弈也碁碁博弈也

擗徒丑居切蒲蒲薄擗徒覽切圍碁博弈也碁碁博弈也

擗徒丑居切蒲蒲薄擗徒覽切圍碁博弈也碁碁博弈也

擗徒丑居切蒲蒲薄擗徒覽切圍碁博弈也碁碁博弈也

丹陽居士賀懋熙懋照懋焚懋壽懋燁仰承
 先嚴賀學禮遺願施貲刻此
 大般涅槃經第二十三卷 計字乙萬一千零
 一十一箇該銀五兩七錢二分
 宛陵釋已圭對長洲徐晉書溧水樂宗袞刻
 萬曆丁巳歲春三月徑山化城寺識

南本大般涅槃經卷第二十四

北涼天竺三藏曇無讖譯梵

宋沙門慧嚴慧觀同謝靈運再治

高貴德王菩薩品第二十二之六

復次善男子云何菩薩摩訶薩修大涅槃微妙經典
 具足成就第九功德善男子菩薩摩訶薩修大涅槃
 微妙經典初發五事悉得成就何等爲五一者信二
 者直心三者戒四者親近善友五者多聞云何爲信
 菩薩摩訶薩信於三寶施有果報信於二諦一乘之
 道更無異趣爲諸衆生速得解脫諸佛菩薩分別爲

三信第一義諦信善方便是名爲信如是信者若諸沙門若婆羅門若天魔梵一切衆生所不能壞因是信故得聖人性修行布施若多若少悉得近於大般涅槃不墮生死戒聞智慧亦復如是是名爲信雖有是信而亦不見是爲菩薩修大涅槃成就初事云何直心菩薩摩訶薩於諸衆生作質直心一切衆生若遇因緣則生諂曲菩薩不爾何以故善解諸法悉因緣故菩薩摩訶薩雖見衆生諸惡過咎終不說之何以故恐生煩惱若生煩惱則墮惡趣如是菩薩若見衆生有少善事則讚歎之云何爲善所謂佛性讚佛

性故令諸衆生發阿耨多羅三藐三菩提心爾時光明徧照高貴德王菩薩摩訶薩白佛言世尊如佛所說菩薩摩訶薩讚歎佛性令無量衆生發阿耨多羅三藐三菩提心是義不然何以故如來初開涅槃經時說有三種一者若有病人得良醫藥及瞻病者病則易差如其不得則不可愈二者若得不得悉不可差三者若得不得悉皆自差一切衆生亦復如是若遇善友諸佛菩薩聞說妙法能發阿耨多羅三藐三菩提心如其不遇則不能發所謂須陀洹斯陀舍阿那舍阿羅漢辟支佛二者雖遇善友諸佛菩薩聞說

妙法亦不能發若其不遇亦不能發謂一闡提三者
若遇不遇一切悉能發阿耨多羅三藐三菩提心所
謂菩薩若言遇與不遇悉發阿耨多羅三藐三菩提
心者如來今者云何說言因讚佛性令諸衆生發阿
耨多羅三藐三菩提心世尊若遇善友諸佛菩薩聞
說妙法及以不遇悉不能發阿耨多羅三藐三菩提
心當知是義亦復不然何以故如是之人當得阿耨
多羅三藐三菩提故一闡提輩以佛性故若聞不聞
悉亦當得阿耨多羅三藐三菩提故世尊如佛所說
何等名爲一闡提謂斷善根如是之義亦復不然何

以故不斷佛性故如是佛性理不可斷云何佛說斷
諸善根如佛往昔說十二部經善有二種一者常二
者無常常者不斷無常者斷無常可斷故墮地獄常
不可斷何故不遮佛性不斷非一闡提如來何故作
如是說言一闡提世尊若因佛性發阿耨多羅三藐
三菩提何故如來廣爲衆生說十二部經世尊譬如
四河出阿耨達池若有天人諸佛世尊說言是河不
入大海當還本源無有是處菩提之心亦復如是有
佛性者若聞不聞若戒非戒若施非施若修不修若
智非智悉皆應得阿耨多羅三藐三菩提世尊如優

陀延山日從中出至于正南日若念言我不至西還
東方者無有是處佛性亦爾若不聞不戒不施不修
不智不得阿耨多羅三藐三菩提者無有是處世尊
諸佛如來說因果性非有非無如是之義是亦不然
何以故如其乳中無酪性者則無有酪尼拘陀子無
五丈性者則不能生五丈之質若佛性中無阿耨多
羅三藐三菩提樹者云何能生阿耨多羅三藐三菩
提樹以是義故所說因果非有非無如是之義云何
相應爾時世尊讚言善哉善哉善男子世有二人甚
爲希有如優曇華一者不行惡法二者忘罪能悔如

是之人甚爲希有復有二人一者作恩二者念恩復
有二人一者咨受新法二者溫故不忘復有二人一
者造新二者修故復有二人一樂聞法二樂說法復
有二人一善問難二善能答善問難者汝身是也善
能答者謂如來也善男子因是善問卽得轉于無上
法輪能枯十二因緣大樹能度無邊生死大海能與
魔王波旬共戰能摧波旬所立勝幢善男子如我上
說三種病人值遇良醫瞻病好藥及以不遇病悉得
差是義云何若得不得謂定壽命所以者何是人已
於無量世中修三種善謂上中下以修如是三種善

故得定壽命如鬱單越人壽命千年有遇病者若得良醫好藥瞻病及以不得悉皆得差何以故得定命故善男子如我所說若有病人得遇良醫好藥瞻病病得除差若不遇者則不得差是義云何善男子如是之人壽命不定命雖不盡有九因緣能夭其壽何等爲九一者知食不安而反食之二者多食三者宿食未消而復更食四者大小便利不隨時節五者病時不隨醫教六者不隨瞻病教勅七者強耐不吐八者夜行以夜行故惡鬼打之九者房室過差以是緣故我說病者若遇醫藥病則可差若不遇者則不可

愈善男子如我上說若遇不遇俱不差者是義云何有人命盡若遇不遇悉不可差何以故以命盡故以是義故我說病人若遇醫藥及以不遇悉不得差眾生亦爾發菩提心者若遇善友諸佛菩薩咨受深法若不遇之皆悉當成何以故以其能發菩提心故如鬱單越人得定壽命如我所說從須陀洹至辟支佛若聞善友諸佛菩薩所說深法則發阿耨多羅三藐三菩提心若不值遇諸佛菩薩聞說深法則不能發阿耨多羅三藐三菩提如不定命以九因緣命則中天如彼病人值遇醫藥病則得差若不遇者病則不

差是故我說遇佛菩薩聞說深法則能發心若不值
遇則不能發如我上說若遇善友諸佛菩薩聞說深
法若不值遇俱不能發是義云何善男子一闡提輩
若遇善友諸佛菩薩聞說深法及以不遇俱不得離
一闡提心何以故斷善法故一闡提輩亦得阿耨多
羅三藐三菩提所以者何若能發於菩提之心則不
復名一闡提也善男子以何緣故說一闡提得阿耨
多羅三藐三菩提一闡提輩實不得阿耨多羅三藐
三菩提如命盡者雖遇良醫好藥瞻病不能得差何
以故以命盡故善男子一闡提名信提名不具信不具

故名一闡提佛性非信衆生非具以不具故云何可
斷一闡提名善方便提名不具修善方便不具足故名
一闡提佛性非是修善方便衆生非具以不具故云
何可斷一闡提名進提名不具進不具故名一闡提佛
性非進衆生非具以不具故云何可斷一闡提名念
提名不具念不具故名一闡提佛性非念衆生非具以
不具故云何可斷一闡提名定提名不具定不具故名
一闡提佛性非定衆生非具以不具故云何可斷一
闡提名慧提名不具慧不具故名一闡提佛性非慧衆
生非具以不具故云何可斷一闡提名無常善提名不

具以無常善不具足故名一闡提佛性是常非善非不善何以故善法要從方便而得而是佛性非方便得是故非善何故復名非不善耶能得善果故善果卽是阿耨多羅三藐三菩提又善法者生已得故而是佛性非生已得是故非善以斷生得諸善法故名一闡提善男子如汝所言若一闡提有佛性者云何不遮地獄之罪善男子一闡提中無有佛性善男子譬如有王聞箜篌音其聲清妙心卽耽著喜樂愛念情無捨離卽告大臣如是妙音從何處出大臣答王如是妙音從箜篌出王復語言持是聲來爾時大臣

卽持箜篌置於王前而作是言大王當知此卽是聲王語箜篌出聲出聲而是箜篌聲亦不出爾時大王卽斷其絃聲亦不出取其皮木悉皆析裂推求其聲了不能得爾時大王卽瞋大臣云何乃作如是妄語大臣白王夫取聲者法不如是應以衆緣善巧方便聲乃出耳衆生佛性亦復如是無有住處以善方便故得可見以可見故得阿耨多羅三藐三菩提一闡提輩不見佛性云何能遮三惡道罪善男子若一闡提信有佛性當知是人不至三趣是亦不名一闡提也以不自信有佛性故卽墮三趣墮三趣故名一闡

提善男子如汝所說若乳無酪性不應出酪尼拘陀
子無五丈性則不應有五丈之質愚癡之人作如是
說智者終不發如是言何以故以無性故善男子如
其乳中有酪性者不應復假衆緣力也善男子如水
乳雜臥至一月終不成酪若以一滯頗求樹汁投之
於中卽便成酪若本有酪何故待緣衆生佛性亦復
如是假衆緣故則便可見假衆緣故得成阿耨多羅
三藐三菩提若待衆緣然後成者卽是無性以無性
故能得阿耨多羅三藐三菩提善男子以是義故菩
薩摩訶薩常讚人善不訟彼缺名質直心復次善男

子云何菩薩質直心耶菩薩摩訶薩常不犯惡設有
過失卽時懺悔於師同學終不覆藏慚愧自責不敢
復作於輕罪中生極重想若人詰問答言實犯復問
是罪爲好不好答言不好復問是罪爲善不善答言
不善復問是罪是善果耶不善果乎答言是罪實非
善果又問是罪誰之所造將非諸佛法僧所作答言
非佛法僧我所作也乃是煩惱之所構集以直心故
信有佛性信佛性故則不得名一闡提也以直心故
名佛弟子若受衆生衣服飲食臥具醫藥種各十萬
不足爲多是名菩薩質直心也云何菩薩修治於戒

菩薩摩訶薩受持禁戒不爲生天不爲恐怖乃至不受狗戒雞戒牛戒雉戒不作破戒不作缺戒不作瑕戒不作雜戒不作聲聞戒受持菩薩摩訶薩戒尸羅波羅蜜戒得具足戒不生憍慢是名菩薩修大涅槃具第三戒云何菩薩親近善友菩薩摩訶薩常爲衆生歎說善道不說惡道說於惡道非善果報善男子我身卽是一切衆生眞善知識是故能斷富伽羅婆羅門所有邪見善男子若有衆生親近我者雖有應生地獄因緣卽得生天如須那刹多等應墮地獄以見我故卽得斷除地獄因緣生於色天雖有舍利弗

目捷連等不名衆生眞善知識何以故生一闍提心因緣故善男子我昔住於波羅柰國時舍利弗教二弟子一觀白骨一令數息經歷多年皆不得定以是因緣卽生邪見言無涅槃無漏之法若其有者我應得之何以故我能善持所受戒故我於爾時見是比丘生此邪心喚舍利弗而訶責之汝不善教云何乃爲是二弟子顛倒說法汝二弟子其性各異一主澣衣一是金師金師之子應教數息澣衣之人應教骨觀以汝錯教令是二人生於惡邪我於爾時爲是二人如應說法二人聞已得阿羅漢果是故我爲一切

衆生眞善知識非舍利弗目犍連等若使衆生有極重結得遇我者我以方便卽爲斷之如我弟難陀有極重欲我以種種善巧方便而爲除之鴛掘魔羅有重瞋恚以見我故瞋恚卽斷阿闍世王有重愚癡以見我故癡心卽滅如婆熙伽長者於無量劫積集成就極重煩惱以見我故卽便斷滅設有弊惡廝下之人親近於我作弟子者以是因緣一切人天恭敬愛念尸利邇多邪見熾盛因見我故邪見卽滅因見我故斷地獄因作生天緣如氣噓旃陀羅命垂終時因見我故還得壽命如憍尸迦狂心錯亂因見我故還

得本心如瘦瞿曇彌屠家之子常作惡業以見我故卽便捨離如闍提比丘因見我故寧捨身命不毀禁戒如草繫比丘以是義故阿難比丘說半梵行名善知識我言不爾具足梵行乃名善知識是名菩薩修大涅槃具足第四親善知識云何菩薩摩訶薩具足多聞菩薩爲大涅槃十二部經書寫讀誦分別解說其名菩薩具足多聞除十一部經惟毗佛略受持讀誦書寫解說亦名菩薩具足多聞除十二部經若能受持是大涅槃微妙經典書寫讀誦分別解說名菩薩具足多聞除是經典具足全體若能受持一四

句偈復除是偈若能受持如來常住性無變易是名
菩薩具足多聞復除是事若知如來常不說法亦名
菩薩具足多聞何以故法無性故如來雖說一切諸
法常無所說是名菩薩修大涅槃成就第五具足多
聞善男子若有善男子善女人爲大涅槃具足成就
如是五事難作能作難忍能忍難施能施云何菩薩
難作能作若聞有人食一胡麻得阿耨多羅三藐三
菩提者信是語故乃至無量阿僧祇劫常食一麻若
聞入火得阿耨多羅三藐三菩提者於無量劫在阿
鼻獄入熾火聚是名菩薩難作能作云何菩薩難忍

能忍若聞受苦手杖刀石所打因緣得大涅槃卽於
無量阿僧祇劫身具受之不以爲苦是名菩薩難忍
能忍云何菩薩難施能施若聞能以國城妻子頭目
髓腦惠施於人得阿耨多羅三藐三菩提者卽於無
量阿僧祇劫以其所有國城妻子頭目髓腦惠施於
人是名菩薩難施能施菩薩雖復難作能作終不念
言是我所作難忍難施亦復如是善男子譬如父母
惟有一子愛之甚重以好衣裳上妙甘膳隨時將養
令無所乏設令其子於父母所起輕慢心惡口罵辱
父母愛故不生瞋恨亦不念言我與是兒衣服飲食

經
大般涅槃經卷二十四
十一
菩薩摩訶薩亦復如是視諸衆生猶如一子若子遇
病父母亦病爲求醫藥勤加救療病旣差已終不生
念我爲是見療治病苦菩薩亦爾見諸衆生遇煩惱
病生愛念心而爲說法以聞法故諸煩惱斷煩惱斷
已終不念言我爲衆生斷諸煩惱若生此念終不得
成阿耨多羅三藐三菩提惟作是念無一衆生我爲
說法令斷煩惱菩薩摩訶薩於諸衆生不瞋不喜何
以故善能修習空三昧故菩薩若修空三昧者當於
誰所生瞋生喜善男子譬如山林猛火所焚若人斫
伐或爲水漂而是林木當於誰所生瞋生喜菩薩摩

訶薩亦復如是於諸衆生無瞋無喜何以故修空三
昧故爾時光明徧照高貴德王菩薩白佛言世尊一
切諸法性自空耶空空故空若性自空者不應修空
然後見空云何如來言以修空而見空耶若性自不
空雖復修空不能令空善男子一切諸法性本自空
何以故一切法性不可得故善男子色性不可得云
何色性色者非地水火風不離地水火風非青黃赤
白不離青黃赤白非有非無云何當言色有自性以
性不可得故說爲空一切諸法亦復如是以相似相
續故凡夫見已說言諸法性不空寂菩薩摩訶薩具

足五事是故見法性本空寂善男子若有沙門及婆
羅門見一切法性不空者當知是人非是沙門非婆
羅門不得修習般若波羅蜜不得入於大般涅槃不
得現見諸佛菩薩是魔眷屬善男子一切諸法性本
自空亦因菩薩修習空故見諸法空善男子如一切
法性無常故滅能滅之若非無常滅不能滅有爲之
法有生相故生能生之有滅相故滅能滅之一切諸
法有苦相故苦能令苦善男子如鹽性鹹能鹹異物
石蜜性甘能甘異物苦酒性醋能醋異物薑本性辛
能辛異物訶梨勒苦能苦異物菴羅果淡能淡異物

毒性能害令異物害甘露之性令人不死若合異物
亦能不死菩薩修空亦復如是以修空故見一切法
性皆空寂光明徧照高貴德王菩薩復作是言世尊
若鹽能令非鹹作鹹修空三昧若如是者當知是定
非善非妙其性顛倒若空三昧惟見空者空是無法
爲何所見善男子是空三昧見不空法能令空寂然
非顛倒如鹽非鹹作鹹是空三昧亦復如是不空作
空善男子貪是有性非是空性貪若是空衆生不應
以是因緣墮於地獄若墮地獄云何貪性當是空耶
善男子色性是有何等是性所謂顛倒以顛倒故衆

生生貪若是色性非顛倒者云何能令衆生生貪以
生貪故當知色性非不是有以是義故修空三昧非
顛倒也善男子一切凡夫若見女人卽生女相菩薩
不爾雖見女人不生女相以不生相貪則不生貪不
生故非顛倒也以世間人見有女故菩薩隨說言有
女人若見男時說言是女則是顛倒是故我爲闍提
說言汝婆羅門若以晝爲夜是卽顛倒以夜爲晝是
亦顛倒晝爲晝相夜爲夜相云何顛倒善男子一切
菩薩住九地者見法有性以是見故不見佛性若見
佛性則不復見一切法性以修如是空三昧故不見

法性以不見故則見佛性諸佛菩薩有二種說一者
有性二者無性爲衆生故說有法性爲諸賢聖說無
法性爲不空者見法空故修空三昧令得見空無法
性者亦修空故空以是義故修空見空善男子汝言
見空空是無法爲何所見者善男子如是如是菩薩
摩訶薩實無所見無所見者卽無所有無所有者卽
一切法菩薩摩訶薩修大涅槃於一切法悉無所見
若有見者不見佛性不能修習般若波羅蜜不得入
於大般涅槃是故菩薩見一切法性無所有善男子
菩薩不但因見三昧而見空也般若波羅蜜亦空禪

波羅蜜亦空毗梨耶波羅蜜亦空羴提波羅蜜亦空尸波羅蜜亦空檀波羅蜜亦空色亦空眼亦空識亦空如來亦空大般涅槃亦空是故菩薩見一切法皆悉是空是故我在迦毗羅城告阿難言汝莫愁惱悲號啼哭阿難卽言如來世尊我今親屬悉皆殄滅云何當得不悲泣耶如來與我俱生此城俱同釋種親戚眷屬云何如來獨不愁惱光顏更顯善男子我復告言阿難汝見迦毗羅城是有我見空寂悉無所有汝見釋種悉是親戚我修空故悉無所見以是因緣汝生愁苦我身容顏益更光顯諸佛菩薩修習如是

空三昧故不生愁惱是名菩薩修大涅槃微妙經典成就具足第九功德復次善男子云何菩薩修大涅槃微妙經典具足最後第十功德善男子菩薩修習三十七品入大涅槃常樂我淨爲諸衆生分別解說大涅槃經顯示佛性若須陀洹斯陀舍阿那舍阿羅漢辟支佛菩薩信是語者悉得入於大般涅槃若不信者輪迴生死爾時光明徧照高貴德王菩薩白佛言世尊何等衆生於是經中不生恭敬善男子我涅槃後有聲聞弟子愚癡破戒喜生鬪諍捨十二部經讀誦種種外道典籍文頌手筆受畜一切不淨之物

言是佛聽如是之人以好旃檀貿易凡木以金易鎗石銀易白鐵絹易氈毼以甘露味易於惡毒云何旃檀貿易凡木如我弟子爲供養故向諸白衣演說經法白衣情逸不喜聽聞白衣處高比丘在下兼以種種肴膳飲食而供給之猶不肯聽是名旃檀貿易凡木云何以金貿易鎗石鎗石譬色聲香味觸金以譬戒我諸弟子以色因緣破所受戒是名以金貿易鎗石云何以銀易於白鐵銀譬十善鐵譬十惡我諸弟子放捨十善行十惡法是名以銀貿易白鐵云何以絹貿易氈毼氈毼以譬無慚無愧絹譬慚愧我諸弟

子放捨慚愧習無慚愧是名以絹貿易氈毼云何甘露貿易毒藥毒藥以譬種種供養甘露以譬諸無漏法我諸弟子爲利養故向諸白衣苦自譽讚言得無漏是名甘露貿易毒藥以如是等惡比丘故是大涅槃微妙經典廣行流布於閻浮提當是之時有諸弟子受持讀誦書寫是經演說流布當爲如是諸惡比丘之所殺害時惡比丘相與聚會共立嚴制若有受持大涅槃經書寫讀誦分別說者一切不得共住共坐談論語言何以故涅槃經者非佛所說邪見所造邪見之人卽是六師六師所說非佛經典所以者何

一切諸佛悉說諸法無常無我無樂無淨若言諸法常樂我淨云何當是佛所說經諸佛菩薩聽諸比丘畜種種物六師所說不聽弟子畜一切物如是之義云何當是佛之所說諸佛菩薩不制弟子斷牛五味及以食肉六師不聽食五種鹽五種牛味及以脂血若斷是者云何當是佛之正典諸佛菩薩演說三乘而是經中純說一乘謂大涅槃如此之言云何當是佛之正典諸佛畢竟入於涅槃是經言佛常樂我淨不入涅槃是經不在十二部數卽是魔說非是佛說善男子如是之人雖我弟子不能信順是涅槃經善

男子當爾之時若有衆生信此經典乃至半句當知是人真我弟子因如是信卽見佛性入於涅槃爾時光明徧照高貴德王菩薩白佛言世尊善哉善哉如來今日善能開示大涅槃經世尊我因是事卽得悟解大涅槃經一句半句以解一句至半句故少見佛性如佛所說我亦當得入大涅槃是名菩薩修大涅槃微妙經典具足成就第十功德
南本大般涅槃經卷第二十四

音釋

析先擊切詰契吉切澣合管切斲新茲切匄居
割也 詰問也 澣衣垢也 斲賤也 匄六

切珍徒典切留莫候切鑽盧合切麩麩力朱切

麩麩毛布也

易財也鑽錫也麩麩胡葛切

丹陽居士賀懋熙懋熙懋熒懋懋燾懋燾仰承
先嚴賀學禮遺願施貲刻此
大般涅槃經第二十四卷 計字六千八百八
十七箇該銀三兩七錢五分
宛陵釋如圭對長洲徐普書句容潘繼德刻
萬曆丁巳歲春三月徑山化城寺識

南本大般涅槃經卷第二十五

北涼天竺三藏曇無讖譯梵

宋沙門慧嚴慧觀同謝靈運再治

師子吼菩薩品第二十三之一

爾時佛告一切大眾諸善男子汝等若疑有佛無佛
有法無法有僧無僧有苦無苦有集無集有滅無滅
有道無道有實無實有我無我有苦無苦有淨無淨
有常無常有乘無乘有性無性有衆生無衆生有有
無有有真無真有因無因有果無果有作無作有業
無業有報無報者今恣汝問吾當爲汝分別解說善

男子我實不見若天若人若魔若梵若沙門若婆羅門有來問我不能答者爾時會中有一菩薩名師子吼即從座起斂容整服前禮佛足長跪叉手白佛言世尊我適欲問如來大慈復垂聽許爾時佛告諸大衆言諸善男子汝等今當於是菩薩深生恭敬尊重讚歎應以種種香華妓樂瓔珞幡蓋衣服飲食臥具醫藥房舍殿堂而供養之迎來送去所以者何是菩薩已於過去諸佛深種善根福德成就是故今於我前欲師子吼善男子如師子王自知身力牙齒鋒芒四足據地安住巖穴振尾出聲若有能具如是諸相

當知是則能師子吼真師子王晨朝出穴頻伸欠呿四向顧望發聲震吼爲十一事何等十一一爲欲環實非師子詐作師子故二爲欲試自身力故三爲欲令住處淨故四爲諸子知處所故五爲羣輩無怖心故六爲眠者得覺寤故七爲一切放逸諸獸不放逸故八爲諸獸來依附故九爲欲調大香象故十爲教告諸子息故十一爲欲莊嚴自眷屬故一切禽獸聞師子吼水性之屬潛沒深淵陸行之類藏伏窟穴飛者墮落諸大香象怖走失糞諸善男子如彼野干雖逐師子至于百年終不能作師子吼也若師子子始

經
滿三年則能哮吼如師子王善男子如來正覺智慧
牙爪四如意足六波羅蜜滿足之身十力雄猛大悲
爲尾安住四禪清淨窟宅爲諸衆生而師子吼摧破
魔軍示衆十力開佛行處爲諸邪見作歸依所安撫
生死怖畏之衆覺寤無明睡眠衆生行惡法者爲作
悔心開示邪見一切衆生令知六師非師子吼故破
富蘭那等憍慢心故爲令二乘生悔心故爲教五住
諸菩薩等生大力心故爲令正見四部之衆於彼邪
見四部徒黨不生怖畏故從聖行梵行天行窟宅頻
伸而出爲欲令彼諸衆生等破憍慢故欠呿爲令諸

衆生等生善法故四向顧望爲令衆生得四無闕故
四足據地爲令衆生具足安住尸波羅蜜故故師子
吼師子吼者名決定說一切衆生悉有佛性如來常
住無有變易善男子聲聞緣覺雖復隨逐如來世尊
無量百千阿僧祇劫而亦不能作師子吼十住菩薩
若能修行是三行處當知是則能師子吼諸善男子
是師子吼菩薩今欲如是大師子吼是故汝等應當
深心供養恭敬尊重讚歎爾時世尊告師子吼菩薩
摩訶薩言善男子汝若欲問今可隨意師子吼菩薩
摩訶薩白佛言世尊云何爲佛性以何義故名爲佛

性何故復名常樂我淨若一切衆生有佛性者何故
不見一切衆生所有佛性十住菩薩住何等法不
了見佛住何法而了了見十住菩薩以何等眼不
了見佛以何眼而了了見佛言善哉善哉善男子若
有人能爲法咨啓則爲具足二種莊嚴一者智慧二
者福德若有菩薩具足如是二莊嚴者則知佛性亦
復解知名爲佛性乃至能知十住菩薩以何眼見諸
佛世尊以何眼見師子吼菩薩言世尊云何名爲智
慧莊嚴云何名爲福德莊嚴善男子慧莊嚴者謂從
一地乃至十地福德莊嚴者謂檀波羅蜜乃至般若

非般若波羅蜜復次善男子慧莊嚴者所謂諸佛菩
薩福德莊嚴者謂聲聞緣覺九住菩薩復次善男子
福德莊嚴有爲有漏有有果報有闕非常是凡夫
法慧莊嚴者無爲無漏無有無果報無闕常住善男
子汝今具足是二莊嚴是故能問甚深妙義我亦具
足是二莊嚴能答是義師子吼菩薩摩訶薩言世尊
若有菩薩具足如是二莊嚴者則不應問一種二種
云何世尊說言能答一種二種所以者何一切諸法
無一二種一種二種者是凡夫相佛言善男子若有
菩薩無二種莊嚴則不能知一種二種若有菩薩具

二莊嚴則能解知一種二種若言諸法無一二者是義不然何以故若無一二云何得說一切諸法無一無二善男子若言一二非凡夫相是乃名爲十住菩薩非凡夫也何以故一者名爲涅槃二者名爲生死何故一者名爲涅槃以其常故何故二者名爲生死愛無明故常涅槃者非凡夫相生死二者亦非凡夫相以是義故具二莊嚴者能問能答善男子汝問云何爲佛性者諦聽諦聽吾當爲汝分別解說善男子佛性者名爲第一義空第一義空名爲智慧所言空者不見空與不空智者見空及與不空常與無常苦

之與樂我與無我空者一切生死不空者謂大涅槃乃至無我者卽是生死我者謂大涅槃見一切空不見不空不名中道乃至見一切無我不見我者不名中道中道者名爲佛性以是義故佛性常恒無有變易無明覆故令諸衆生不能得見聲聞緣覺見一切空不見不空乃至見一切無我不見於我以是義故不得第一義空不得第一義空故不行中道無中道故不見佛性善男子見中道者凡有三種一定樂行二定苦行三苦樂行定樂行者所謂菩薩摩訶薩憐憫一切諸衆生故雖復處在阿鼻地獄如三禪樂定

苦行者謂諸凡夫苦樂行者謂聲聞緣覺聲聞緣覺行於苦樂作中道想以是義故雖有佛性而不能見善男子如汝所言以何義故名佛性者善男子佛性者卽是一切諸佛阿耨多羅三藐三菩提中道種子復次善男子道有三種謂下上中下者梵天無常謬見是常上者生死無常謬見是常三寶是常橫計無常何故名上能得最上阿耨多羅三藐三菩提故中者名第一義空無常見無常常見於常第一義空不名爲下何以故一切凡夫所不得故不名爲上何以故卽是上故諸佛菩薩所修之道不上不下以是義

故名爲中道復次善男子生死本際凡有二種一者無明二者有愛是二中間則有生老病死之苦是名中道如是中道能破生死故名爲中以是義故中道之法名爲佛性是故佛性常樂我淨以諸衆生不能見故無常無樂無我無淨佛性實非無常無樂無我無淨善男子譬如貧人家有寶藏是人不見以不見故無常無樂無我無淨有善知識而語之言汝舍宅中有金寶藏何故如是貧窮困苦無常無樂無我無淨卽以方便令彼得見以得見故是人卽得常樂我淨佛性亦爾衆生不見以不見故無常無樂無我無

淨有善知識諸佛菩薩以諸方便種種教誥令彼得見以得見故衆生卽得常樂我淨復次善男子衆生起見凡有二種一者常見二者斷見如是二見不名中道無常無斷乃名中道無常無斷卽是觀照十二緣智如是觀智是名佛性二乘之人雖觀因緣猶亦不得名爲佛性佛性雖常以諸衆生無明覆故不能得見又未能度十二緣河猶如兔馬何以故不見佛性故善男子是觀十二因緣智慧卽是阿耨多羅三藐三菩提種子以是義故十二因緣名爲佛性善男子譬如胡瓜名爲熱病何以故能爲熱病作因緣故

十二因緣亦復如是善男子佛性者有因有因有果有果果有因者卽十二因緣因因者卽是智慧有果者卽是阿耨多羅三藐三菩提果果者卽是無上大般涅槃善男子譬如無明爲因諸行爲果行因識果以是義故彼無明體亦因因識亦果亦果果佛性亦爾善男子以是義故十二因緣不出不滅不常不斷非一非二不來不去非因非果善男子是因非果如佛性是果非因如大涅槃是因是果如十二緣所生之法非因非果名爲佛性非因果故常恒無變以是義故我經中說十二因緣其義甚深無知無

見不可思惟乃是諸佛菩薩境界非諸聲聞緣覺所
及以何義故甚深甚深衆生業行不常不斷而得果
報雖念念滅而無所失雖無作者而有作業雖無受
者而有果報受者雖滅果不敗亡無有慮知和合而
有一切衆生雖與十二因緣共行而不見知不見知
故無有終始十住菩薩惟見其終不見其始諸佛世
尊見始見終以是義故諸佛了了得見佛性善男子
一切衆生不能見於十二因緣是故輪轉善男子如
蠶作繭自生自死一切衆生亦復如是不見佛性故
自造結業流轉生死猶如拍毬善男子是故我於諸

經中說若有人見十二因緣卽是見法見法者卽是
見佛佛者卽是佛性何以故一切諸佛以此爲性善
男子觀十二緣智凡有四種一者下二者中三者上
四者上上下下智觀者不見佛性以不見故得聲聞道
中智觀者不見佛性以不見故得緣覺道上智觀者
見不了了不了了故住十住地上上智者見了了故
得阿耨多羅三藐三菩提道以是義故十二因緣名
爲佛性佛性者卽第一義空第一義空名爲中道中
道者卽名爲佛佛者名爲涅槃師子吼菩薩摩訶薩
白佛言世尊若佛與佛性無差別者一切衆生何用

修道佛言善男子如汝所問是義不然佛與佛性雖無差別然諸衆生悉未具足善男子譬如有人惡心害母害已生悔三業雖善是人故名地獄人也何以故是人定當墮地獄故是人雖無地獄陰界諸入猶故得名爲地獄人善男子是故我於諸經中說若見有人修行善者名見天人修行惡者名見地獄何以故定受報故善男子一切衆生定得阿耨多羅三藐三菩提故是故我說一切衆生悉有佛性一切衆生眞實未有三十二相八十種好以是義故我於此經而說是偈

本有今無

本無今有

三世有法

無有是處

善男子有者凡有三種一未來有二現在有三過去有一切衆生未來之世當得阿耨多羅三藐三菩提是名佛性一切衆生現在悉有煩惱諸結是故現在無有三十二相八十種好一切衆生過去之世有斷煩惱是故現在得見佛性以是義故我常宣說一切衆生悉有佛性乃至一闍提等亦有佛性一闍提等無有善法佛性亦善以未來有故一闍提等悉有佛性何以故一闍提等定當得成阿耨多羅三藐三菩

提善男子譬如有人家有乳酪有人問言汝有酥耶
答言我有酪實非酥以巧方便定當得故故言有酥
衆生亦爾悉皆有心凡有心者定當得成阿耨多羅
三藐三菩提以是義故我常宣說一切衆生悉有佛
性善男子畢竟有二種一者莊嚴畢竟二者究竟畢
竟一者世間畢竟二者出世畢竟莊嚴畢竟者六波
羅蜜究竟畢竟者一切衆生所得一乘一乘者名爲
佛性以是義故我說一切衆生悉有佛性一切衆生
悉有一乘以無明覆故不能得見善男子如鬱單越
三十三天果報覆故此間衆生不能得見佛性亦爾

諸結覆故衆生不見復次善男子佛性者卽首楞嚴
三昧性如醍醐卽是一切諸佛之母以首楞嚴三昧
力故而令諸佛常樂我淨一切衆生悉有首楞嚴三
昧以不修行故不能得見是故不得成阿耨多羅三
藐三菩提善男子首楞嚴三昧者有五種名一者首
楞嚴三昧二者般若波羅蜜三者金剛三昧四者師
子吼三昧五者佛性隨其所作處處得名善男子如
一三昧得種種名如禪名四禪根名定根力名定力
覺名定覺正名正定八大人覺名爲定覺首楞嚴定
亦復如是善男子一切衆生具足三定謂上中下上

者謂佛性也。以是故言一切衆生悉有佛性。中者一切衆生。具足初禪。有因緣時。則能修習。若無因緣。則不能修。因緣二種。一謂火災。二謂破欲界結。以是故言一切衆生悉具中定。下定者。十大地中心數定也。以是故言一切衆生悉具下定。一切衆生悉有佛性。煩惱覆故。不能得見。十住菩薩。雖見一乘。不知如來。是常住法。以是故言十地菩薩。雖見佛性。而不明了。善男子。首楞者。名一切事竟嚴者。名堅。一切畢竟。而得堅固。名首楞嚴。以是故言首楞嚴。定名爲佛性。善男子。我於一時。住尼連禪河。告阿難言。我今浴洗汝

可取衣。及以澡豆。我旣入水。一切飛鳥水陸之屬。悉來觀我。爾時復有五百梵志。來在河邊。因到我所。各相謂言。云何而得金剛之身。若使瞿曇。不說斷見。我當從其啓受齋法。善男子。我於爾時。以他心智。知是梵志心之所念。告梵志言。云何謂我說於斷見。諸梵志言。瞿曇。先於處處經中。說諸衆生悉無有我。旣言無我。云何而言非斷見耶。若無我者。持戒者。誰破戒者。誰佛言。我亦不說一切衆生悉無有我。我常宣說一切衆生悉有佛性。佛性者。豈非我耶。以是義故。我不說斷一切衆生不見佛性。故無常無我無樂無淨。

如是則名說斷見也時諸梵志聞說佛性卽是我故
卽發阿耨多羅三藐三菩提心尋時出家修菩提道
一切飛鳥水陸之屬亦發無上菩提之心旣發心已
尋得捨身善男子是佛性者實非我也爲衆生故說
名爲我善男子如來有因緣故說無我爲我眞實無
我雖作是說無有虛妄善男子有因緣故說我爲無
我而實有我爲世界故雖說無我而無虛妄佛性無
我如來說我以是常故如來是我而說無我得自在
故爾時師子吼菩薩言世尊若一切衆生悉有佛性
如金剛力士者以何義故一切衆生不能得見佛言

善男子譬如色法雖有青黃赤白長短質像盲者不
見雖復不見亦不得言無青黃赤白長短質像何以
故盲雖不見有目見故佛性亦爾一切衆生雖不能
見十住菩薩見少分故如來全見十住菩薩所見佛
性如夜見色如來所見如晝見色善男子如眼膚翳
見色不了有善良醫而爲治之以藥力故得了了見
十住菩薩亦復如是雖見佛性不能明了以首楞嚴
三昧力故能得明了善男子若有人見一切諸法無
常無我無樂無淨見非一切法無常無樂無我無淨
如是之人不見佛性一切者名爲生死非一切者名

爲三寶聲聞緣覺見一切法無常無我無樂無淨非
一切法亦見無常無我無樂無淨以是義故不見佛
性十住菩薩見一切法無常無我無樂無淨非一切
法分見常樂我淨以是義故十分之中得見一分諸
佛世尊見一切法無常無我無樂無淨非一切法見
常樂我淨以是義故見於佛性如觀掌中阿摩勒果
以是義故首楞嚴定名爲畢竟善男子譬如初月雖
不可見不得言無佛性亦爾一切凡夫雖不得見亦
不得言無佛性也善男子佛性者所謂十力四無所
畏大悲三念處一切衆生悉有三種破煩惱故然後

得見一闡提等破一闡提然後能得十力四無所畏
大悲三念處以是義故我常宣說一切衆生悉有佛
性善男子十二因緣一切衆生等共有之亦內亦外
何等十二過去煩惱名爲無明過去業者是名爲行
現在世中初始受胎是名爲識入胎五分四根未具
名爲名色具足四根未名觸時是名六入未別苦樂
是名爲觸染習一愛是名爲受習近五欲是名爲愛
內外貪求是名爲取爲內外事起身口意業是名爲
有現在世識名未來生現在名色六入觸受名未來
世老病死也是名十二因緣善男子一切衆生雖有

如是十二因緣或有未具如歌羅羅時死則無十二
從生乃至老死得具十二色界衆生無三種受三種
觸三種愛無有老病亦得名爲具足十二無色衆生
無色乃至無有老死亦得名爲具足十二以定得故
故名衆生平等具有十二因緣善男子佛性亦爾一
切衆生定當得成阿耨多羅三藐三菩提故是故我
說一切衆生悉有佛性善男子雪山有草名爲忍辱
牛食者則出醍醐更有異草牛若食者則無醍醐
醍醐不可說言雪山之中無忍辱草佛性亦爾
雪山者名爲如來忍辱草者名大涅槃異草者十二

部經衆生若能聽受咨啓大般涅槃則見佛性十二
部中雖不聞有不可說言無佛性也善男子佛性者
亦色非色非色非非色亦相非相非相非非相亦一
非一非一非非一非常非斷非非常非非斷亦有亦
無非有非無亦盡非盡非盡非非盡亦因亦果非因
非果亦義非義非義非非義亦字非字非非字非非字
云何爲色金剛身故云何非色十八不共非色法故
云何非色非非色色非色無定相故云何爲相三十
二相故云何非相一切衆生相不現故云何非相非
非相相非相不決定故云何爲一切衆生悉一乘

經
大智度論卷三十五
十四
故云何非一說三乘故云何非一非非一無數法故
云何非常從緣見故云何非斷離斷見故云何非非
常非非斷無終始故云何爲有一切衆生悉皆有故
云何爲無從善方便而得見故云何非有非無虛空
性故云何名盡得首楞嚴三昧故云何非盡以其常
故云何非盡非非盡一切盡相斷故云何爲因以了
因故云何爲果果決定故云何非因果以其常故
云何名義悉能攝取義無闕故云何非義不可說故
云何非義非非義畢竟空故云何爲字有名稱故云
何非字名無名故云何非字非非字斷一切字故云

何非苦非樂斷一切受故云何非我未能具得八自
在故云何非非我以其常故云何非我非非我不作
不受故云何爲空第一義空故云何非空以其常故
云何非空非非空能爲善法作種子故善男子若有
人能思惟解了大涅槃經如是之義當知是人則見
佛性佛性者不可思議乃是諸佛如來境界非諸聲
聞緣覺所知善男子佛性者非陰界入非本無今有
非已有還無從善因緣衆生得見譬如黑鐵入火則
赤出冷還黑而是黑色非內非外因緣故有佛性亦
爾一切衆生煩惱火滅則得聞見善男子如種滅已

茅則得生而是芽性非內非外乃至華果亦復如是
從緣故有善男子是大涅槃微妙經典成就具足無
量功德佛性亦爾悉是無量無邊功德之所成就爾
時師子吼菩薩摩訶薩言世尊菩薩具足成就幾法
得見佛性而不明了諸佛世尊成就幾法得了了見
善男子菩薩具足成就十法雖見佛性而不明了云
何爲十一者少欲二者知足三者寂靜四者精進五
者正念六者正定七者正慧八者解脫九者讚歎解
脫十者以大涅槃教化衆生師子吼菩薩言世尊少
欲知足有何差別善男子少欲者不求不取知足者

得少之時心不悔恨少欲者少有所欲知足者但爲
法事心不愁惱善男子欲有三種一者惡欲二者大
欲三者欲欲惡欲者若有比丘心生貪欲欲爲一切
大衆上首令一切僧隨逐我後令諸四部悉皆供養
恭敬讚歎尊重於我令我先爲四衆說法皆令一切
信受我語亦令國王大臣長者皆恭敬我令我大得
衣服飲食臥具醫藥上妙屋宅爲生死欲是名惡欲
云何大欲若有比丘生於欲心云何當令四部之衆
悉皆知我得初住地乃至十住得阿耨多羅三藐三
菩提得阿羅漢果乃至須陀洹果我得四禪乃至四

無閔智爲於利養是名大欲欲欲者若有比丘欲生
梵天魔天自在天轉輪聖王若刹利若婆羅門皆得
自在爲利養故是名欲欲若不爲是三種惡欲之所
害者是名少欲欲者名爲二十五愛無有如是二十
五愛是名少欲不求未來所欲之事是名少欲得而
不著是名知足不求恭敬是名少欲得不積聚是名
知足善男子有少欲不名知足有知足不名少欲有
亦少欲亦知足有少欲不知足少欲者謂須陀洹
知足者謂辟支佛少欲知足者謂阿羅漢不少欲不
知足者所謂菩薩善男子少欲知足復有二種一者

善二者不善不善者所謂凡夫善者聖人菩薩一切
聖人雖得道果不自稱說不稱說故心不惱恨是名
知足善男子菩薩摩訶薩修習大乘大涅槃經欲見
佛性是故修習少欲知足云何寂靜寂靜有二一者
心靜二者身靜身寂靜者終不造作身三種惡心寂
靜者亦不造作意三種惡是則名爲身心寂靜身寂
靜者不親近四衆不預四衆所有事業心寂靜者終
不修習貪欲恚癡是則名爲身心寂靜或有比丘身
雖寂靜心不寂靜有心寂靜身不寂靜有身心寂靜
又有身心俱不寂靜身寂靜心不寂靜者或有比丘

坐禪靜處遠離四衆心常積習貪欲恚癡是名身寂
靜心不寂靜心寂靜身不寂靜者或有比丘親近四
衆國王大臣斷貪恚癡是名心寂靜身不寂靜身心
寂靜者謂佛菩薩身心不寂靜者謂諸凡夫何以故
凡夫之人身心雖靜不能深觀無常無樂無我無淨
以是義故凡夫之人不能寂靜身口意業一闡提輩
犯四重禁作五逆罪如是之人亦不得名身心寂靜
云何精進若有比丘欲令身口意業清淨遠離一切
諸不善業修習一切諸善業者是名精進是勤進者
繫念六處所謂佛法僧戒施天是名正念具正念者

所得三昧是名正定具正定者觀見諸法猶如虛空
是名正慧具正慧者遠離一切煩惱諸結是名解脫
得解脫者爲諸衆生稱美解脫言是解脫常恒不變
是名讚歎解脫卽是無上大般涅槃涅槃者卽是煩
惱諸結火滅又涅槃者名爲屋宅何以故能遮煩惱
惡風雨故又涅槃者名爲歸依何以故能過一切諸
怖畏故又涅槃者名爲洲渚何以故四大暴河不能
漂故何等爲四一者欲暴二者有暴三者見暴四者
無明暴是故涅槃名爲洲渚又涅槃者名畢竟歸何
以故能得一切畢竟樂故若有菩薩摩訶薩成就具

經
六和集經卷二十五
十一
十一
足如是十法雖見佛性而不明了復次善男子出家之人有四種病是故不得四沙門果何等四病謂四惡欲一爲衣欲二爲食欲三爲臥具欲四爲有欲是名四惡欲是出家病有四良藥能療是病謂糞掃衣能治比丘爲衣惡欲乞食能破爲食惡欲樹下能破臥具惡欲身心寂靜能破比丘爲有惡欲以是四藥除是四病是名聖行如是聖行則得名爲少欲知足寂靜者有四種樂何等爲四一出家樂二寂靜樂三永滅樂四畢竟樂得是四樂名爲寂靜具四精進故名精進具四念處故名正念具四禪故故名正定見

四聖實故故名正慧永斷一切煩惱結故故名解脫訶責一切煩惱過故名讚歎解脫善男子菩薩摩訶薩安住具足如是十法雖見佛性而不明了復次善男子菩薩摩訶薩聞是經已親近修習遠離一切世間之事是名少欲既出家已不生悔心是名知足既知足已近空閑處遠離憤鬧是名寂靜不知足者不樂空閑夫知足者常樂空寂於空寂處常作是念一切世間悉謂我得沙門道果然我今者實未能得我今云何誑惑於人作是念已精勤修習沙門道果是名精進親近修習大涅槃者是名正念隨順天行

是名正定安住是定正見正知是名正慧正見知者
能得遠離煩惱結縛是名解脫十住菩薩爲衆生故
稱美涅槃是則名爲讚歎解脫善男子菩薩摩訶薩
安住具足如是十法雖見佛性而不明了復次善男
子夫少欲者若有比丘住空寂處端坐不臥或住樹
下或在塚間或在露處隨有草地而坐其上乞食而
食隨得爲足或一坐食不過一食惟畜三衣糞衣毳
衣是名少欲旣行是事心不生悔是名知足修空三
昧是名寂靜得四果已於阿耨多羅三藐三菩提心
不休息是名精進繫心思惟如來常恒無有變易是

名正念修八解脫是名正定得四無闕是名正慧遠
離七漏是名解脫稱美涅槃無有十相名歎解脫十
相者謂生老病死色聲香味觸無常遠離十相名大
涅槃善男子名菩薩摩訶薩安住具足如是十法雖
見佛性而不明了復次善男子爲多欲故親近國王
大臣長者刹利婆羅門毗舍舍訶自稱我得須陀洹
果至阿羅漢果爲利養故行住坐臥乃至大小便利
若見檀越猶行恭敬接引語言破惡欲者名爲少欲
雖未能壞諸結煩惱而能同於如來行處是名知足
善男子如是二法乃是念定近因緣也常爲師宗同

學所讚我亦常於處處經中稱美讚歎如是二法若能具足是二法者則得近於大涅槃門及五種樂是名寂靜堅持戒者名爲精進有慙愧者名爲正念不見心相名爲正定不求諸法性相因緣是名正慧無有相故煩惱則斷是名解脫稱美如是大涅槃經名讚解脫善男子是名菩薩摩訶薩安住十法雖見佛性而不明了善男子如汝所言十住菩薩以何眼故雖見佛性而不了了諸佛世尊以何眼故見於佛性而得明了善男子慧眼見故不得明了佛眼見故故得明了爲菩提行故則不了了若無行故則得了了

住十住故雖見不了了不住不去故則得了了菩薩摩訶薩智慧因故見不了了諸佛世尊斷因果故見則了了一切覺者名爲佛性十住菩薩不得名爲一切覺故是故雖見而不明了善男子見有二種一者眼見二者聞見諸佛世尊眼見佛性如於掌中觀阿摩勒十住菩薩聞見佛性故不了了十住菩薩雖能自知定得阿耨多羅三藐三菩提而不能知一切衆生悉有伽性善男子復有眼見諸佛如來十住菩薩眼見佛性復有聞見一切衆生乃至九地聞見佛性菩薩若聞一切衆生悉有佛性心不生信不名聞見

南本大般涅槃經卷第二十五

音釋

芒

武方切

欠

欠去劒切

吐

丘伽切

欠

欠去而解也

寤

五故切

窟

苦没切

蠶

昨含切

繭

古典切

翳

於計切

毳

昌芮切

丹陽居士賀懋熙懋照懋榮懋熹懋煒仲承
 先嚴賀學禮遺願施贊刻此
 大般涅槃經第二十五卷 計字八千五百七
 十六箇該銀四兩六錢八分
 宛陵釋如圭對長洲徐普書旌德劉邦承刻
 爲曆丁巳歲春三月徑山化城寺識

八
廿
九